



O lo'o i ai se āta sa tusia i le seneturi 17 e se ali'i tusi āta ta'uta'ua o Caravaggio ua ta'ua *O le Lē Talitonu a Sagato Toma*. O lo'o pu'epu'eina mai ai le taimi na tu'uina atu ai e Toma le masalosalo o ona tama'ima'i lima i le manu'a a Iesu Toetū. O lenei va'aiga ua aumai e le tusitusiga a le Evagelia a Ioane: 'Ae o Toma (sa fa'aigoaina fo'i o le masaga), se tasi o le to'asefulu ma le lua, ua igoa o Titumo, e le'i i ai o ia ma i latou ina ua maliu atu Iesu. Ona fai atu lea o le 'au so'o uma iā Toma, "Ua matou iloa atu le Ali'i." A ua fai mai o Toma iā te i latou, "Afai ou te lē va'ai atu i ona lima, i mea na tutu'i ai fao, ma tu'u lo'u tama'itama'i lima i lona itū, ou te lē talitonu lava."

Ua mavae aso e valu, ua toe fa'atasi ona so'o i le fale, ua fa'atasi ai fo'i i latou ma Toma, ua maliu atu Iesu o pupuni faitoto'a, ua tu fo'i o ia i totonu, ma fetalai atu lea o ia iā Toma, "Aumai ia lou tama'itama'i lima i'inei, va'ai mai fo'i i o'u lima; tu'u mai ia fo'i lou lima, ma tu'u mai i lo'u itū; aua fo'i e te masalosalo vale, a 'ia e fa'atuatua.

Ona tali mai lea o Toma, ua fa'apea mai iā te ia, Lo'u Ali'i e, ma lo'u Atua e." Ua fetalai atu Iesu iā te ia, "Toma e, ua e fa'atuatua, auā ua e va'ai mai iā te a'u. Amuia o ē lē va'ai mai, ae fa'atuatua mai pea" Ioane 20: 24 – 27).

A faia ni tusitusiga e uiga i le fa'atuatuaga e faigatā ona iloa po o fea e amata mai ai. O lo'o tatou ola ai nei i se aganu'u e foliga mai e mana'omia se molimau va'aia mo so'o se mea moni lava. 'Fa'aali mai iā te a'u le molimau' o lo'o foliga o lo'o fai mai ai le lalolagi ma ona fa'apea lea ona ou talitonu, e pei o Toma.

O tusitusiga a le Fonotaga a le Vatikanu Lua i le Ekalesia i le Lalolagi i ona po nei ua aumaia se va'aiga i le tulaga o le tagata ina ua fa'apea mai: O la tatou taunu'uga maua lava o le feiloa'i atu lea i le Atua. Ua tatou fananau mai i le alofa, fa'aolaola e le alofa, ma tupu i le ola ma fa'amaopo mai ma le sa'olotoga (*Gaudium et Spes*. 19).

Atonu o se nofoaga lelei lenei e amata ai. O le Fa'atuatua e lē tele ile uiga o le molimau ae e uiga i le feiloa'iga. Ae o le ā le ituaiga o feiloa'iga? Tomanatu i le Tusi iā Eperu, "O le fa'atuatua o le fa'alagolago lea i mea ua fa'amoemoe i ai, o le mautinoa lea o mea e lē o va'aia" (Eperu: 11: 1). O se faia'oga sa fa'aailoa mai o le fa'atuatua e feso'ota'i i mea tatou lē va'ai i ai ae ua fa'amoemoe i ai. O le fa'atuatua e uiga i mea ua tua atu o le tafa'ilagi a le mafai a le tagata. Fa'atuatua o le su'esu'e i mea e lē mafai ona ausia e tagata lava ia. Fa'atuatua o le *mana'omia* fa'amisitelio i totonu o tatou e alu atu ai i le mea tatou te mautinoa e lē o'o atu i ai. Fa'atuatua, o le mea moni lava, o lona uiga o le mea ua tatou ta'ua o le Atua. Fa'atuatua o le manatu o tatou sa tatau ona ave ma mamana, o a tatou faigamalaga o le a alu atu i tua atu o le tafa'ilagi ma aga'i atu i le leai o se muta'aga a le Aiga o le Atua...Fa'atuatua e lē o se mea ua tatou umia. O se mea ua umia ma ulufia ai i tatou.

O le tu'inanau e masalosalo vaganā o lo'o i ai se molimau o se vaega e lē mafa'atiaina o le tulaga fa'aletagata; e pei ona fa'aalia e Toma le Masaga, o lo'o i ai se Toma iā i tatou ta'ito'atasi. Ae i la tatou sa'iliga mo le fa'atuatua, ina ia sa'ili na o le molimau o le amataina lea mai le nofoaga sesē; fa'atuatua o lona uiga o mana'oga 'ese'ese. Mo le fa'atuatua e taula'i i folafolaga a le lumana'i i'inei ma le taimi nei. O lenā folafolaga o le lumana'i o se taunu'uga mamana ma o lenā taunu'uga ua fa'atosigaina ai o tatou mea moni i auala e lē masani ona va'aia ma i nisi o taimi e lē manino, ae a feiloa'i atu i ai o se moni e fa'amalieina; o se malamalamaina e 'ese fo'i lenei. Ona o lē e talitonu e lē feagai atu i le fa'atuatua o se mea o latou lava na faia, ae ua maitauina galuega a le Atua i o latou olaga. O le fa'atuatua, e pei ona fa'aailoa mai e se tasi, o le umia po o le ulufia lea e le Atua. O le vala'uina o latou ua talitonu o le tu'uina atu lea o le avanoa iā te 'oe

FA'ATUATUA

lava ina ia opogi e le afio ai mamana. O le tu'uina atu o le avanoa i le Atua ia avea ma Atua i le olaga o lē ua talitonu.

I le amataga o le evgaelia a Ioane o Anitele'a ma isi so'o ua fa'asino atu iā Iesu e Ioane le Papatiso. A latou o atu iā Iesu na te lē ofoina atu ni fa'amatalaga po o ni molimau mo le talitonuga; ua ia fai mai 'O mai ma va'ai' – ua ia ofoina atu se vala'aulia – 'ma sa latou fa'atasi ma ia i le aso atoa.' I lenā evagelia atoa ua feiloa'i atu tagata iā Iesu, ma i le faia o lea feiloa'iga ma le Atua ma ua umia e le Atua ma o la latou tali i le fa'atuatua – e pei o le fafine Samaria o lē na tu'ua lana fagu vai ma ta'u atu i tagata o lona nu'u 'O mai ma va'ai.' Mo Tomasi le Masaga ma isi i le evagelia ma fa'apea le tala'aga fa'asolopito, fa'atuatua e lē fa'apea o molimau e fuaina, ae o Keriso ina ia feiloa'i atu i ai.

Manuia le malaga atu aga'i i le Eseta..

Sagato—Patele Engelmar Unzeitig

Ositaulaga ma le Maletile (1911 – 1945)

Engelmar Unzeitig na fanau i se pitonu'u Siamani o Czechoslovakia i le tausaga 1911. A o tamaitiiti sa moe moti e avea ma ositaulaga fa'amisionare – malaga atu i atunu'u 'ese, ina ia tu'utō lona ola "i le fa'aliliuina o le 'au fa'apaupau," ma atonu e ofo atu ai ma lona ola mo le fa'aolataga o aga-ga. Ina ua sefulufitu ona tausaga sa ulufale atu i le seminalio a le ituaiga o Mariahill misionare. O lana fa'au'uga, na fa'ataunu'uina iā Aukuso 15, 1939, lua vaiaso talu ona amataina le taua lona lua a le lalolagi. I le lua tausaga na mulimuli mai ai na saisaia o ia e leoleo nanā Siamani, ma molia o ia i le faia o "fa'aaliga taufa'avalea" ma le puipuia o tagata Iutaia i ana lauga. Iā Iuni 1941 ua tu'uina atu o ia i se falepuipui ta'uta'ua i Dachau, e ui atu i le ala ulufale i lalo o le tagavai ta'uta'ua, "Galue e Fa'asa'olotoina ai 'Oe." Ae sa ia feiloa'i atu i se misiona ua 'ese tele i lo le mea sa ia mafaufauina.

Dachau, e i Bavaria, o se tasi o ulua'i nofoaga e falepuipui ai pagota a Nazi Siamani, fa'avaeina i le 1933 ina ia loka ai pagotā fa'aupufai. I le taimi o le taua o le aofai o tagata na lokaina na tuputupu a'e i le lua selau afe pagotā mai le tusa ma le fasefulu atunu'u. Na a'afia ai se aofa'iga e lē masani ai o ni patele ma isi faife'au, pe tusa ma le tolu afe na ta'u maia, o le tolu kuata o latou o ni Katoliko. Taofia i se inosia fa'apitoa e le SS, o le au ositaulaga sa vavae'eseina iā latou lava fale, sa iloaina o "falepuipui a Faife'au." Mo se mafua'aga tatau, na fa'aigoaina Dachau o le "Monaseli aupito le telē i le lalolagi." O i'inā o le fa'atasi ai ma le palapalā, malepe, matelāina, ma le si'osi'omaga o le oti, o patele ma faife'au sa fa'auuina pea la latou tala'iga. Sa latou tatalo fa'atasi, Katoliko ma Porotosano. Sa latou tusia ni pese lotu, patipatia fa'alilolilo ni Misasa ma a leai ua taumafai ni sauniga fa'alafulemū i o latou uso pagotā.

Mo le faife'au fa'atoā fa'au'u o Patele Engelmar, Dachau ua na o le pau lea o le tofiga ua ia iloaina o se ositaulaga. E ui i tulaga ua pei o seoli, ae sa ia taumafai e va'ai i ai o se a'oga mo le 'au nofo to'atasi. I se tusi na avatu fa'ananā i lona tuafafine sa ia tusia ai e fa'apea, "O mea ua va'aia i isi o taimi o ni malaia e masani o ni manuia silisili. Le anoano ua a'oa'oina ma maua mai e se tagata e ala i le potō masani i le a'oga o le olaga nei. E tatau iā i tatou ona lagona ma maua le potō masani mo isi, ua ou manatu, o le leai o se filemū i le lalolagi ma fesoasaoni atu iā te i latou i le aga'i atu i le filemu moni. Ona tatou lē fa'ate'ia lea o i tatou pe afai e ave'eseina e le Atua mai iā i tatou nisi o mea ua pele ma taūa iā i tatou."

A lē o 'au ai i galuega fai fa'amalosi, ua fa'aalu lona taimi i le fa'amafanafanaina ma le fa'amalosi'au i isi ma molimau ma le filemū le malosi o le fa'atuatua. Sa ia faia se tala'iga fa'apitoa i pagotā a Lusua. E ui o le to'atele o latou o ni komunisi, sa ia mauaina lo latou fa'atuatuaga ma le fa'auō ma fa'atasi ai ma lo latou fiafia mo le tele o itula e fa'atalanoa ai le uiga o le olaga ma la latou fa'asalaga ua i ai.

Sa mafai e Engelmar ona olaola ai pea mo le fa tausaga – fa tausaga o le fia 'ai, ina ua avea le mutia ma vao o ni mea'ai ua mana'omia tele, tausaga o le pologa, sauaga ma le sasa, fa'ama'i ma le

Patele Engelmar Unzeitig

malulū na tetele. Sa ia ola mai ai nei mea uma ma sa masalomia e ola ai mai le taua pe ana leai le pipisi o le fa'ama'i o le taifoi na pepesi i le falepuipui i le vaitau malulū 1945. Iā Ianuari lava ia e luaafe valuselau pagotā na maliliu ona o le fa'ama'i. O latou sa maua ai sa fa'aanu'ua i se pa fa'apitoa na o latou ma maliliu ai i se faiga leaga tele ma e leai se isi e va'aia i latou. Sa alu le vala'au mo ni tagata e ofo mai lo latou fesoasoani. E luasefulu ni patele na ofo atu. O Patele Engelmar o se tasi o i latou na ofo atu.

O le uiga o lenei gaoiga sa manino ile to'atele. O ositaulaga – na ofo atu o latou taimi na ulufale atu i fale sa to'ese ai le au mama'i, o ni fale ua matuā leaga tele. O 'utu ua feavea'ia fa'ama'i ua tumu ai le fale, o le fola ua tafe solo ai le toto, feanuga, ma palapala ale 'au maliliu. I totonu o ifēli a Dachau ua mautinoa lelei o le nofoaga ogatotonu lenei. Ae aga'i atu i lenei gaogao ua aumai ai e ositaulaga la latou alofa ma le fa'atuatuaga, faia ia lelei vaiaso ua latou maua mo ia tagata ina ia latou mauaina se faiga lelei ma le mamalu i lea nofoaga. Sa anoanoa'i galuega e tatau ona faia i le va'aia o le au mama'i – fufuluina o latou tino ua fa'aletonu ma 'a'afia i le fiva, fa'amamā a latou moega ua tele le leaga ma le palapalā ma taumafai e mauaina ni mea'ai lelei. Ae sa feagai fo'i faife'au ma le faia o kofesio, fa'ae'eina o sauniga mulimuli, ma laulauina tatalo mo le 'au maliliu. E lē ulufia e le au SS le pa puipui o le mea lea sa sa'oloto ai lava faife'au e fa'atino la latou fa'atuatuaga.

Fai mai nisi sa sao mai ai ma molimau, o Patele Engelmar o se agelu o le alofa, o lē sa sasa'a atu o ia lava i se 'au'aunaga e lē va'aia se vaivai ma le lēlavā i ana fa'auō. O lea ua taunu'u le misiona ua ia fa'apa'iaina ai o ia. Mai le luasefulu patele sa ofoina atu i latou lava i le pa puipui sa maua i le fa'ama'i o le taifoi, na o le lua na soifua mai. O Patele Engelmar e lē o se tasi o i la'ua nei. I le ono o vaiaso o lona tino ua mū i le fiva. Ae sa fa'auau pea ona faia kofesio ma sakalameta a o la e mafai. Na maliu o ia i le aso 2 o Mati, 1945, le aso na mulimuli mai i le atoaga o lona 34 tausaga ma i nai vaiaso i luma atu na fa'asa'olotoina ai lea nofoaga e fitafita Amerika.

I se tusi na tusia i aso i luma mai o lona maliu, sa ia tusia ai: “O le Lelei e lē uma ma le manumalō e tatau ona tumau ma le Atua, e ui i nisi o taimi ua va'aia e lē aogā mo tatou ona fa'asalalau le alofa i le lalolagi. Ae ui i lea, e va'ai pea, pea lava o le loto a le tagata ua fa'atasi i le alofa, ma e lē mafai ona te'ea lona malosi i se taimi umi, pe afai o lo'o fa'avae moni i le Atua ma e lē o meaola. Tatou te manana'o e fa'auau pea ona faia ma ofo atu mea uma lava ina ia toe nofotupu mai le alofa ma le filemū.”

Vaiaso Maliu amata i le Aso Sa Tolu o le Fagafalu – Mati 3 2024, Ioane 2: 13 - 2

A tatou faitau i le Evagelia o le asō, ua fa'amanatu maia iā i tatou se teuteuina i totonu o le Paselika o le Susulu ale Ma'itaga Imakulata, le tasi ua tatou fa'asino i ai o “Iesu ĩta.” A tatou saili i tafa'ilagi 'Iesu ĩta” o fa'amatalaga e uiga i le tu'ufa'atasia o ni ma'a fa'aailoga. Ua fa'aigoaina “O Keriso i le Mamalu,” ma e maofa tele. E pei ona fa'amatalaina e le tafa'ilagi a le Paselika, o se tasi fa'atusa aupito sili lona telē i le lalolagi e 3, 600 futu le laua'itele, ma e sili atu ma le 3, 000 le fa'apaologa o tioata venise. O le va'aiga i foliga a Iesu i lenā tioata, i se va'aiga muamua matamuli, ĩta. Ae a e va'ava'ai lelei i ai, o lo'o fa'aali mai ai se tasi e lototele, malosi ma malū. E lē masalomia lana pule.

Pe e te fiafia i lenei ma'a fa'aailoga pe leai, o ia ma le fe'au mai le Evagelia o le asō ua fa'aalia mai ai se itū a Iesu atonu tatou te popole aga'i i ai. E masani, tatou te manatu o Iesu e filemū, agalelei ma o se tagata e agamalū e fiafia e alu i patī ma e alofa i tamaiti. O le itū ua tatou va'aia i le asō e naunau, fa'atonu ma malosi. Ma e tau misitelio fo'i. O le fa'atau atu o mamoe, povi ma pato e lē o le mataupu i le faitauga o le asō. Talu ai ona o le motu o tagata faimalaga ua o atu i Ierusalemā mo le Paseka, e to'atele o le a filifili e fa'atau a latou manu mo le faitaulaga i'ina i lo le malaga mai ma i latou. O le mataupu o tagata e fefa'ataua'i oloa ma tagata e fesua'i tupe sa fa'atagaina i totonu o le malumalu i lo fafo i le lotoā le nofoaga e tutupu ai nei fefa'ataua'iga. O le malumalu o se nofoaga e pa'ia ua fai ma sui o le va feagai ai a le Atua ma le tagata. Ma o le faiga fa'atagata o le fa'atau mai ma le fa'atau atu

ua sosolo mai i totonu. Sa fa'aailoa atu e Iesu o ia ma le pule (ma le sasa). Sa ia fai atu, e leai, e lē o le fale a lo'u Tamā.

O le asō, tatou te fesiligia i tatou lava: o a mea ua tatou tu'uina atu e sosolo mai i totonu o le malumalu o a tatou loto? Tatou manatu iā Iesu – e lē o ita ae o se va'aiga ua naunau – fesoasoani ai iā i tatou e ave'ese atu ni mea o lo'o taofiofi ai i tatou mai le alofa ma 'au'auna atu i le Atua i ala ua ia fuafuaina. Ua na o se malumalu mamā o le a faia lea. O le asō, tatou te fesiligia ai i tatou lava: o a mea ua tatou tu'uina atu e totolo mai i malumalu o tatou loto? Tatou manatu iā Iesu, e lē ita ae fa'atasi ai ma se va'aiga naunauta'iga – fesoasoani mai iā i tatou e ave'ese atu ni mea ua taofiofi mai ai i tatou i le alofa ma le 'au'auna atu i le Atua i 'auala ua ia fuafuaina. Ua na o se malumalu mamā o le a faia fa'apea.

Aso Gafua o le Vaiaso Tolu o le Fagafulu - Luka 4: 24 0 30.

Sa silafia lelei e Iesu o ai ia. O tagata i Nasareta, le 'a'ai a Iesu, *sa manatu* sa latou iloaina o ia. O tagata i le sunako sa fetautalaa'i "O lenā ali'i, Iesu, o se tagata maofa tele, a 'ea? 'Oi, ioe, Iesu? O se tagata lauiloa, a 'ea? O ia o le atali'i a Iosefo."

Sa latou faia na tala, ae i lo le olioli i o latou vi'ivi'iga, sa fai atu Iesu, "Amene, e moni, ou te fai atu iā te outou, e le talia se perofeta i lona nu'u moni." Sa manatu ua latou malamalama i le uiga o lenā ua ia tu'u fa'atasia o ia ma perofeta ma ua ia fai atu iā i latou: o outou e lē lelei so outou tala'aga ma perofeta. Ona ia fa'aalia manino lea o lona manatu. E to'alua perofeta, lua Tagata o Nu'u'ese, ma perofeta ma e na fa'aluaaina ona perofeta sa fesoasoani i tagata i tua atu o latou nofoaga tagatā nu'u. O Elia sa auina atu i se fafine ua oti lana tane o Sarefata i taimi o le oge, ma o ia ma lana tama na fa'aolatia. O isi e le'i fa'amanuiaina. Na fa'amamāina e Elia Naamanu le Suria mai le ma'i o le lepela ae sa i ai tagata Isaraelu e le'i fa'amaloloina. O se taimi o le taufaifai. O latou sa fa'alogo iā te ia ua fēitai ma tumu i le fa'ao'olima ia te ia, ae o Iesu ua sola 'ese atu ma tu'ua lona nu'u. O lenei vaega ua fa'aailoa mai ai mea o le a tupu. O Iesu o le a taliaina e isi ma te'ea sa'o e isi. A o tatou aga'i atu i le Fagafulu, ia tatou tatalo mo loto ina ia tatala i le fe'au a le Fagafulu: salamō ma talitonu i le Evagelia.

4

Aso Lua o le Vaiaso Tolu o le Fagafulu – Aso 5 Mati 2024. Mataio 18: 21 - 35

E lua ituaiga o aitalafu, ae tasi le olega: A e onosa'i mai, ona ou totogiina atu lea."

I le Evagelia o le asō, ua fa'amatala e Iesu se fa'ata'oto e tali atu ai i le fesili a Peteru, "Le Ali'i e, afai e agasala mai fa'afia lo'u uso iā te a'u, e fa'afia ona 'ou fa'amagalo iā te ia? Se'i atu fitu 'ea?" O le tasi muamua na aitalafu i le tupu atonu pe tusa ma le miliona talā. Sa aga'i atu le tupu e fa'ao' se fa'asalaga ua tatau i le 'au'auna, ae sa mutimuti alofa ma fa'amagalo lea aitalafu. O le lona lua o lē sa aitalafu, o se isi 'au'auna, sa aitalafu mo se vaega e itiiti ifo i lē na muamua ua fa'amagaloina. Sa 'ai'oi atu mo le fa'amagaloga ae na lafoia i le falepuipui se'i uma ona totogi lana aitalafu. E leai se mea fa'apenei e faigofie ona natia, ma e mautinoa lava, o isi 'au'auna sa molimau i nei faiga na o atu i le tupu ma lipoti atu le fa'agasologa atoa. Ma o se i'uga e lē fiafia mo le 'au'auna fa'amagaloina.

O le fa'ata'oto a Iesu na i'u ma se lapata'iga: "E fa'apea fo'i ona faia iā te outou e lo'u Tamā o i le lagi, pe afai tou te lē ta'itasi ma fa'amagalo ma outou loto atoa i o outou uso." E lē o se fa'amagaloga i malae ta'alo a a'oga. E lē o se ita e teuteu pea. Leai se manatu mo se noataga. E tatau o le mea e moni. Afai o lenei e fai sina faigatā, e fa'apena lava! Afai e fa'alogoina e sauā, fuafua aitalafu ua tatou nofo aitalafu ai i le Atua le Tamā. O a tatou aitalafu sa totogiina e Iesu i luga o le koluse." E lē tatau 'ea ona e alofa atu i lou uso a 'au'auna, e pei o a'u fo'i na alofa atu iā te 'oe?" O le Fagafulu ua aumaia iā i tatou se isi avanoa e fa'amagalo ai se isi ua fa'atigā mai iā i tatou – i ni auala tetele pe itiiti fo'i, tatalo i le asō, talosaga atu i le Atua e fa'aali atu iā 'oe le mea atonu o lo'o u'umau ai ni manu'aga mai taimi ua tuana'i ma fa'aailoa atu o ai e mana'omia ona e fa'amagalo atu i ai. Ona amata lea o le fa'aleleiga

Aso Lulu o le Vaiaso Tolu o le Fagafulu – Mati 6. 2024 – Mataio 5: 17 - 19

“Ou te le’i sau e tatalaina ae ia fa’ataunu’uina”

O latou sa fa’alogologo iā te ia ua iloaina Tulafono a le Feagaiga Tuai; atonu latou te le’i iloaina uma le 613 o Tulafono, ae sa latou iloaina Poloa’iga e Sefulu – ‘aua le fasioti tagata, ‘aua le gaoi, ‘aua le mulilua, tausi i le Sapati, fa’aaloalo i lou tamā ma lou tinā, ma fa’apea ai lava. O le Tulafono lenei sa ola ai, ma o nei tuā’oi sa faigofie ona fa’amatalaina. Ae o a’oa’oga a Iesu ua foliga mai e pei o ni mea fou atoatoa. Ua fa’amanuiaina le au matitiva. E ao ona alolofa atu i fili. O e ua muamua o le a mulimuli. Liliu atu le isi alafau. Avea e pei o tamaiti. E fa’apefea i nei mea uma ona fa’ataunu’uina le lisi umi Tulafono Fa’atulagaina? Alofa. Alofa i le Atua ma alofa i lou tuā’oi ua fa’ataunu’uina ai e lē na o le tusi o le Tulafono ae o le agaga. Afai ua tatou taofiofi mai le fasioti tagata, ua tatou fa’ataunu’uina le Tulafono. Ae afai tatou te lē ita, ua tatou fa’ataunu’uina le agaga o le Tulafono. A tatou te’ea le mulilua, ua tatou fa’ataunu’uina le tusi o le Tulafono. Ae afai tatou te lē fa’amalieina o tatou manatu tu’inanau, ua tatou fa’ataunu’uina lona agaga. Ma fa’apea ai lava. Ua tu’uina mai e Iesu ni taunu’uga tatou te aga’i atu i ai i lenei faitauga o le Evagelia. Se tasi o taunu’uga ia ‘aua nei solia “se tasi o nei Tulafono” pe ta’ita’ia isi i lea auala. O le isi taunu’uga o le “usita’ia ma a’oa’o” atu nei poloa’iga,” – ua sau ma ni ponesi: o le a vala’auina i tatou i le “silisili i le Malō o le lagi.”

Aso Tofi o le Vaiaso Tolu o le Fagafulu. Mati 7, 2024. Luka 11: 14 – 23.

Maofa po le fa’avalevalea.

I le faitauga mai le Evagelia o le asō, sa tatau ona avatu e Iesu se lesona itiiti i le manatu i nisi o tagata sa tumutumu ai ma molimauina o ia na tuli’eseina temoni mai se ali’i gūgū. Ina ua tautala mai le ali’i gūgū, sa maofa i latou Ona amata lea ona tuputupu a’e ni manatu fa’avalevalea i o latou mafaufau. Ona o le mana a Pelesepulo, le perenise o temoni, sa ia tuli’eseina ai temoni. Ua pei o le molimauina o se foma’i o faia se fa’amaloloina fa’avavega ma, i lo’o le fa’ailoaina le atamai fa’afoma’i ma le malamalama ua i ai, o le masalosalo ua tu’uina atu ai i ni faiga taufa’asesē, folafola mai o le foma’i o lo’o fa’aogaina se malosi alofa po ni uiga taufa’ase’e ina ia ausia ai le fa’amalologa.

Sa iai nisi Iutaia i le taimi na tuli ‘ese ai temoni, na fesili atu Iesu iā i latou po ai o lo’o latou faia i ai nei fa’amalologa. Sa ia maileia i latou iā latou lava finauga ona o le a latou ta’u maia e lē o latou lava o lo’o tuli’eseina temoni ae o le Atua. Na toe fa’ailoa atu e Iesu o ai ia ma le pule - o ia o se tagata e sili atu le malosi e osofa’ia ma pulea le tevolo. Mo tatou, e pei o le au faitio a Iesu i lenā taimi, e tatau ona tatou filifili po o fea o i ai a tatou fa’amaoni. E le mafai ona tatou ti’eti’e i le pa i lenei manatu. O le mea e mafai ona tatou faia i le asō o le Fagafulu o le fesoasaoni iā Iesu e fa’apopotoina i tatou.

Aso Faraile o le Vaiaso Tolu o le Fagafulu. Mati 8, 2024. Mareko 12: 28 – 34.

O le faitauga o le Evagelia mo le asō ua manatu e fa’amoemoeina ma lu’itauina

O le mea ua tatou maua e fa’amoemoeina sa i ai se tusiupu – o se atamai i tusitusiga ma mau pa’ia ma le faia’oga o le Tulafono na aga’i atu iā Iesu e lē faitio ae ina ia faia se fa’atalanoaga i le atamai ma ia i le mataupu e taūa tele ai le Tulafono. Sa aumai e Iesu ni fa’aupuga mai le tusitusiga pa’ia sa iloa e malamalama lelei i ai le tusiupu. Sa tatala atu e le tusiupu lona tagata ma naunau ina ia malamalama – sa ia toe fai mai upu sa fai atu ai Iesu i ana lava upu, fa’aali mai ai sa ia fa’alogologo lelei lava. O le mea ua mafai ona tatou a’oa’oina mai ai i lenei talanoaga e tele lava. O lenei le lu’itau. Atonu ua to’aitiiti nisi, ae masalo o lo’o i ai se uiga e mafaufau ai o lenei a’oa’oga a Iesu o se tele i upu manaia, se ituaiga o fa’amafanafanaga fa’aleagaga. Ae o le mea moni lava, o lo’o i le fatu lona uiga o le ola ai o se so’o. Ua feso’ota’i e Iesu le alofa i le Atua ma le alofa i o tatou tuā’oi. E lē fevaeae’eseina. E lē mafai ona tatou fai mai tatou te alolofa i le Atua ae lē alofa i o tatou tuā’oi. E lē mafai fo’i ona tatou

Aso Faraile o le Vaiaso Tolu o le Fagafulu. Mati 8, 2024. Mareko 12: 28 – 34.

alolofa moni i o tatou tuā'oi e aunoa ma le alofa i le Atua. O le Atua o lo'o i le ogatotonu o tatou olaga ua mafai ai mo i tatou ona ola mo isi. O le lu'itau lenei. Sa saunoa Pope Faranisisi e uiga i lenei faitauga i se tatalo o le Agelu, ua fa'apea mai, "O le alofa i le Atua o le ola ai lea o ia ma mo ia, ona o ia ma, mo mea ua ia faia. O lo tatou Atua o se foa'i *lē fa'amu'taina*, o ia o le *fa'amagaloga* e leai se muta'aga; o ia o se *va feagai ai* e fa'aailoa ma fa'afailele. O le mea lea, o le alofa i le Atua o lona uiga o le tu'uina atu o tatou malosi i aso ta'itasi e aveva ma ona fesoasoani i le 'au'aunaga e lē muta i tuā'oi, i le taumafai e fa'amagaloga e aunoa ma ni muta'aga, ma i le fausia o le va feagai ai a fa'apotopotoga ma le usoga. O le nofononofo ai ma lenei faitauga i le asō, tatou te fesiligia i tatou lava i ni fesili loloto. Pe tatou te alolofa i le Atua ma o tatou loto atoa, agaga, mafaufau, ma le malosi? A leai, aiseā? Pe ou te alofa i lo'u tuā'oi – tagata uma lava?

Aso To'ona'i Vaiaso Tolu o le Fagafulu. Mati 9, 2024. Luka 18: 9 – 14.

O lo'o i ai uma elemene a se poka mālie. O se Farasaio ma se ao lafoga ua savavali atu i le nofoaga o lo'o i ai le malumalu.

O tala mālie ua fa'atusatusa ai tagata mai ni tulaga 'ese'ese tele e lua ua fa'aogaina le mālie e fa'atele ai le 'ese'esega, ta'ita'ia atu i se tulaga e fa'avalevaleyaleva e uiga mālie. Ua latou aumai ai fo'i ni fa'amatalaga fa'asosaiete, fa'aailoa mai ai lea ituaiga, ma ua tatou mauaina ai le mālie i le maitauina ma fesiligia nei va'aiga e uiga i amioga a le tagata. E lē o tausua mai Iesu, e ui o lo'o ia filifilia ma le mautinoa se Farasaio fa'aalologia ma se ao lafoga e itagia e momoli mai ai lana fe'au. O le tatalo ale Farasaio e mata'utia lona manatu fa'apito. Ua ia matuā'i *ta'u* atu i le Atua lona ia silisili ma e lē talosaga atu iā ia mo se mea. O le tatalo ale ao lafoga o lo'o manino mai le agaga ma lalo ma le salamō, 'ai'oi atu mo le alofa. O ai a'u? Pe ou te talosaga atu? Ioe, o a'u o le ao lafoga! Sa'o?

6

A tatou manatu i lenei, ua tatou iloaina i o tatou loto o tatou o ni Farasaio i lenei tala. Le Atua e, matou te fa'afetai atu iā te oe e lē pei i matou o tagata i le laina o lenei fale fa'atau fuala'au – e leai so latou lagona alofa, ua latou manatu ifo lava na o latou, ma ua leai se fa'aaloalo – e pei o lenā tagata i tua o le laulau fa'atau. Matou te tataloina le losalio i aso ta'itasi, ma matou avatu i le tele o aiga le mana'omia i Kilisimasi ta'itasi.

Folo. Ua aumai manino e Iesu o ai o le a alu i lona aiga ma le ta'uamionuina, ma e lē o le Farasaio o lo'o i totonu o a'u. O le Fagafulu e masani ona aumai iā i tatou se isi avanoa ina ia faia ia lelei o tatou olaga fa'aleagaga. Ma o le asō, ua tatou maua ai se isi avanoa e aga'i atu ai i le Atua e pei ona faia e le ao lafoga – ma le mautinoa lelei i o tatou natura agasala ma o tatou mana'oga mo ia, talosaga atu mo lona alofa. 'Le Atua e, alofa mai iā te a'u, o se agasala.'

Mareko 1: 14. O Le Taunu'uga a Iesu ma ana a'oa'oga e uiga i le malō

I nai fuaiupu nei na mafai ai e Mareko ona aumai fa'atasi ni manatu autū o lana galuega. O le tu'ua e Ioane le Papatiso o se manatu mo Iesu e amataina lana galuega o le olaga mo ali'i o ni fa'aailoa o le tala lelei. O le upu Eleni mo le 'tala'i' o lona uiga o le gaiou o sē ua lautogia e fa'aailoaina o le tala lelei, o se tasi o le 'a'ai ua aloa'ia ona tofia na te fa'aailoaina atu i tagata o le 'a'ai ni tala fou o ni atugaluga tele iā i latou. O lea tagata sa i ai sona vaega taūa tele i taimi o taua, pe a taunu'u mai tala o le manumalō po o le to'ilalo fo'i o lona uiga o le 'ese'esega i le va o le ola ma le oti mo tagata. E lē o se matafaioi a le tagata lea ona toloa pe finau atu e uiga i le tala lelei, ae ia folafolaina fa'alaua'itele ma le mamao fo'i ina ia fa'asoa uma i lona olioli. Sa manuia Mareko i le tu'uina mai iā i tatou se va'aiga fa'apea o Iesu ma lana tala'iga. O lenei folafolaga fa'aaposetolo na faia e Iesu na alu lelei mo ana fuafuaga, ona na mafai ai ona fa'aosofia le tuluiina ai le fa'aosofiaina o tatou fiafia ma mafua ai ona tatou fesiligia o tatou fa'amoemoega ma uiga fa'aalia. A tatou misia le fiafia ua fa'atupulia e le fe'au ona fa'afuase'ia lea ona tatou maua i le fa'a'esea, o isi atonu ua amata ona faia

Mareko 1: 14. O Le Taunu'uga a Iesu ma ana a'oa'oga e uiga i le malō

le fiafia.!

O le anotusi o le fe'au a Iesu ua a'afia ai le malō o le Atua. I le mataupu 4 o le a tatou a'oa'oina mai ai e uiga i lenei manatu ma ona faiga o le tu'uina atu o ia lava i le lalolagi, ae o i'inei e tataou ona tatou taumafai e malamalama i se mea o lona uiga mai le amataga ma le malosī. A mafaufauina e le tagata i ona po nei se malō, e mafaufau sa'o lava i lau'ele'ele ma fanua ma ona tuā'oi, o le au ofisa a le malō ma fa'alapotopotoga. Ae ui i lea, o le lalolagi anamua sa alu atu i nei mataupu i se faiga ua sili atu le fa'apitoa ona o le olaga e le'i mautū e pei ona i ai nei. O se pitonu'u a se tupu ua laua'itele atu i le mamao o lana pulega. O le mea lea o le tulaga muamua ua fa'amamafaina e masani o le pulega ale tupu i lo le malō o lo'o galue ai. Ua moni a'ia'i lenei i le malō o le Atua na tala'ia e Iesu. O le tala'aga vave o le apokolifa talu ai Iutaia, o se ituaiga o tusitusiga sa alia'i mai i seneturi mulimuli e lua i luma mai o Keriso sa fa'amafanafana ma fa'amalosī'au ai tagata Iutaia sa fa'asalaina ona o la latou fa'amaoni i le fa'atuatua ma le lotonu'u. I se va'aiga masani o le fe'au a le apokolifa sa va'aia le malō ale Atua o se fa'alavelave fou atoatoa ua faia mo ona tagata. O ni manatu e pei o le toetū mai o lē na oti ma le foafoaga fou ua tula'i mai i lenei tusitusiga ua maua i ai ni fa'amatalaga o le vevesi fa'avanimonimo, fa'aailoga ma le matagofie. O le manatu fa'atelosia fa'avae ua fa'aailoa mai ai nei fa'amatalaga uma o le talitonuga mo le tulaga fa'alelotu a le tagata ina ia suia ma le tevolo o lo'o i ai fa'aletagata i lenā tulaga ia fa'aleagaina i'ina o se mana'oga mo se fa'alavelave mata'utia e le Atua i le tala'aga a le tagata o le a fa'aumatia ai le malosī a le tevolo ma fa'avae ae lana pule fa'atupu e ola ai i le filemū ma le fealofani o tagata. O le mea lea, o le apolokalifa ua faia le una'ia 'autū a le feagai-ga fa'atelosia a Isaraelu, ua fa'apea mai, o le Atua ua fa'amaoni i ana folafolaga ma i le i'uga o mea uma o le a alualu lelei mo ona tagata.

O le manatu o le malō ale Atua ua fa'a'autū atoatoa i tala'iga a Iesu, ma le fa'aupuga ua va'aia mo le 104 taimi i ona laugutu i evagelia. Mo ia o le gaioga mulimuli o le fa'aolataga sa tupu i totonu ma ala mai i lana tala'iga. O le taimi sa fa'ataunu'uina ai se manatu, o le manatu po o afea i le malō o le Atua o le a fa'aailoa mai ai o ia lava, ua le toe va'aia ai uiga fa'aapokolifa a tagata Iutaia. Mulimuli ane ua fa'apa'iaina e le Atua lana pule fa'atupu i se i'uga mulimuli ma le malosī a le tevolo o le a fa'aleagaina ma le mautinoa. E lē fa'apea ona ua tunu'u i se tulaga fa'apitoa, ae o le taimi o le fa'atalitali ua uma; o le lalolagi tuai ua mae'a lana savaliga ma o le tu'uina mai e le Atua o ia lava i le lalolagi ua taunu'u lona taimi maualuga ma le avanoa a le tagata ua i le fa'atumutumuga. O lo'o i ai se 'ese'esega taūa e tasi, e ui i lea, i le va o le malamalama'aga a Iesu i le malō ma le au Iutaia fa'aapolokalifa, e lē afaina po o le a le anoanoa'i o ni manatu fa'apea. O se fa'atusatuga ma Ioane le Papatiso ua fa'amalamalamaina i'inei. Mo Ioane o le malō ale Atua ua sau nei o se fa'amasinoga: 'O lo'o tu'u nei fo'i le to'i i tafu'e o la'au', ae fa'atasi ai ma Iesu o lo'o i ai pea o se kalasia mamā ma le fa'amagaloga. E lē o ave'eseina e Iesu le manatu o le fa'anatinati i le fa'atatau i le malō ma le tali a le tagata i ai, ae ua ia suia le fa'amamafaina. O le malō, mo Iesu, ua fa'aali mai ma e ala i le maualalo o lana ia tala'iga, o le Atua e nofo ai lona lima fa'amasino ma tali atu i le talosaga 'tu'u pea ia i lenei tausaga, atonu e fua mai ni fua'. O le mea lea, ile tala'iina atu e Iesu o le malō o le Atua o se vala'au fa'aletagata i lo se fa'aaliga fa'aapolokalifa, ma o le vaega lenei o le taufa'aleaga o lana tagi. Ae o se vala'au fa'apea ua fa'atatau ina ua ofoina mai e le Atua lava ia i le tagata o se 'ele'ele ma se punavai o lana fa'ataunu'uga. Ae ui i lea, ina ia talia se ofo fa'apea e tataou i le tagata ona sauniuni e tu'uina atu ona ia fa'afoliga; e tataou ia te ia ona suia lona loto, ona sa ia le'i fa'anaunau i nisi o pulega fa'atupu vaganā o ona ia lava fa'anaunauga talu mai Atamu, o le ali'i na agasala, sa filifilia ala a le gata i le amataga.

O le vala'au a Iesu e lē na o se vaega ua tu'ufua o mafua'aga o amioga lelei. Ae o se maumaututū loloto fa'aletagata, fa'avae i luga o le poto masani o lona olaga. Mo ia fo'i o le malō o le Atua sa i ai o se afio ai vāvālalata ma le mana'oga na faia e lenei iā te ia o se Alo alofagia. E mafai ona ta'u atu e Iesu i isi e mulimuli atu iā te ia ma le mautinoa tele o ona ala ole ala moni e talia ai i le malō: afai e te ulufale atu i le ola 'mulimuli mai iā te a'u' (Mk 10: 17 – 22). Le atoatoa o le tu'uina – atu e Iesu o ia lava o le talitonu i le tala lelei e uiga iā te ia ma talia le a'afiaga mata'utia o le fa'aso'oina ma ia ua tutusa lea ma le tu'uina atu o le tasi i le pule fa'alemalō ale Atua ua ia a'oa'oina mai. Ua va'aia e Mareko le feso'ota'iga loloto ua i ai nei i le va o le evagelia e uiga iā Iesu ua ia aumaia i le au faitau ma le tala lelei a le malō sa a'oa'oina e Iesu i le taimi o lona soifuaga. O le tala lelei lava e tasi i le va'ai i

Mareko 1: 14. O Le Taunu'uga a Iesu ma ana a'oa'oga e uiga i le malō

le alofa foa'i a le Atua ma le fa'anaunauga mata'utia ua tu'uina mai nei i le tagata. O le mea lea i le amataga mai ua fa'amautinoa i lē ua faitauina o le āta ua tu'uina mai ua fa'atuatua na o le tala lelei o lo'o i ai nei: O le manumalō ale Atua o le taimi nei.

Aso Sa Tolu – Vaitau o le Fagafulu

O le ola ai i se vaitau o le sa'olotoga fa'atasi ma ni Tulafono ua tau'ai i le matagi ma tagata ua fuafuaina mo latou lava o a mea e sa'o ma mea sesē, atonu tatou te fesili po o le a le mea ua tupu i poloa'iga e sefulu. Pe o taūa pea po ua fai sina tuai? O le tu'uina atu o poloa'iga e le Ali'i iā Mose i le Mauga o Sinai na fa'aailoa mai ai le fanau o Isaraelu o se atunu'u. Mo tagata Iutaia, o le usita'ia o poloa'iga i aso ta'itasi o le olaga e le'i fuafuaina o le faia o le mea e sa'o, ae sa va'aia o le ola ai o se va feagai ai ma le tagata moni o le Atua. O le tausia o poloa'iga, mo tagata Iutaia, o le tali atu lea i le alofa i le atamai ale Atua o lē ua noatia o ia lava i ona tagata. Sa latou va'aia poloa'iga o le atamai ale Atua ua fa'asoa ma i latou o se mealofa – o se vala'aulia ia amio e pei o le Atua ma e lē na o se tofotofoga o lo latou usita'i. O la tatou sosaiete ua maoa'e ma le alu i luma ma le atamai i lo Isaraelu i le taimi o Mose, ae po o le sa'o po le sesē o lo'o tutusa lava i le taimi nei. O nei poloa'iga e sefulu o a'atonu nei a lo tatou fa'atuatuga. So'o se atunu'u lava e lē mulimulita'i i nei ta'iala fa'avae o lo'o mauaina se ituaiga o olaga e lē tatau ona olaina ma o le a malaia ma mālepelepe. Tatou te mana'omiaina pea poloa'iga ona o piliki ma omea, o le fa'avae tonu lea o se sosaiete mautū.

8

I le tuli'eseina o le au fa'atau oloa mai le malumalu, ua fa'aailoa e Iesu se fa'aaloalo tele mo le Fale ale Ali'i ma tu'uina mai iā i tatou se fa'ata'ita'iga pe fa'apefea ona tatou fa'aaloaloga a tatou lava nofoaga mo faigataulaga ma va'ai i ai o ni nofoaga pa'ia mo faigā tatalo. O le malumalu e le'i sili atu i lo nofoaga maketi ua pisa tele mo tagata o lo'o fa'atau atu a latou oloa ma tagata fa'atau mai. O le au fai pisinisi ua agasala i le fa'aogaina o le fale ale Atua mo lo latou lava mafuaga o le manatu fa'apito o le sa'ilia o tupe. O a latou vevesi ma le pisapisa o sa fa'aalia le leai o se fa'aaloalo mo le agaga o faigataulaga moni. Ua tatou va'aia Iesu ua toe fai atu ma le fa'aaloalo tele mo le suafa o le Atua ma le fale ale Atua ona o le fefa'atauaiga atoa lava ua aveva ma se sauniga ua gaogao, ua natia ai le uiga moni o le malumalu.

Ona o se fa'apotopotoga ua tatou potopoto ai i aso Sa ta'itasi e patipatia le Eukalisitia ma fa'afetaia le Atua mo le vaiaso ua tuana'i. O aso uma a le Ali'i e tatau ona pei o se sitepu aga'i atu i le lagi ae o fa'apea ona fai? Po o tatou latalata atu i le Atua i le 'au ai i lenei taeao po o a tatou talosaga i Aso Sa ua fa'aleagaina i se sauniga e leai sona uiga, o se tafaoga fa'asosaiete po o se mea ua tatou faia ona ua fuafuaina mo tatou? O le Sapati e tatau iā i tatou ona talisapaia le Atua i lugā, le lalolagi ua ia aumaia iā i tatou ma tagata o lo'o si'osi'omia ai i tatou. E masani o la tatou talitonuga ua aumai i lalo mai le fata, avatu, e pei ona i ai, se taeao o le aso Sa ua tafitafi ona toe tu'uina atu lea i le fata i le afa o le sefululua. E mana'o le Atua ma fa'anaunau mo tatou ina ia vivi'i atu o ia e lē na o upu ae fa'apea amio-ga. Vivi'i o lona uiga o le fai atu i le Atua: 'Ua silisili lava 'oe.' O le a la sa tatou tali pe a tatou maitauina le agalelei o le Atua i o tatou olaga ma iloaina, ona o le Ali'i o lo tatou leoleo mamoe, e leai se mea tatou te matitiva ai. Vivi'i, ma auala ua tatou ola ai e lē fa'apea ua motusia mai ai le tasi mai le isi. Fa'apea le alu atu i le falesa i aso Sa, ua vala'auina i tatou ina ia 'au atu i le falesa a o tatou sosaiete i le vaiaso.

Aso Sa Fa - Vaitau o le Fagafulu

O le moni aupito sili le loloto o le fa'agae'etia ua a'oa'oina e le Ekalesia e alofa le Atua iā i tatou e fa'avavau. O le Fa'akerisiano o lo'o mau a'a i le manatu o le alofa ale Atua e a'apa mai i lalo i le tagata o Iesu iā tatou le 'au mama'i, mafatia ma le lalolagi ua tigā. Mo loto fa'atuatua uma o le 'auga lenei o le tala a le evagelia. Ua leai se vaega o le tusitusiga pa'ia ua sili atu lona tu'uina mai i lo upu na tau-

Aso Sa Tolu – Vaitau o le Fagafulu

tala atu ai Iesu ia Nikotemo, ‘Auā ua fa’apea lava ona alofa mai o le Atua i le lalolagi ua ia aumai ai lona Atali’i e to’atasi ina ia lē fano se tasi o ē fa’atuatua iā te ia, a ‘ia maua e ia le ola e fa’avavau.’ O a tatou alofa mo isi e lē fa’atusalia le ituaiga o alofa ale Atua mo tatou. O le lautele o lona alofa mo le lalolagi, na ia ofo atu le ola i tagata uma. E alofa le Atua iā i tatou ta’ito’atasi e pei e leai se isi e alofa atu i ai. O ia o le Tamā e mana’o e savali fa’atasi ma lona aiga a o latou savalia lenei olaga ma e lē fa’amalieina se’ia taunu’u mai lana fanau ta’asē ma le saogalemū i le aiga.

Ua amata ona tatou maitauina le anoanoa’i o le alofa ale Atua mo tatou i le va’ai atu ile koluse. O lo’o fa’ailoa mai ai le fa’atusa o le Keriso puapuagatia si’i a’e i luga o le koluse, talia le mamafa atoatoa le tevelo o a tatou agasala. O leaga uma ole olaga, le itagia ma le leai o se fai mea tonu ua tu’uina uma atu i le koluse ua fa’atu i luga o le mauga o Kalevalio. Se tasi o manatu ofoofogia e uiga i le puapuagā ma le maliu a Keriso ua avefa ma molimau a’ia’i o le alofa ale Atua. A fa’aletonu mea uma, leai se fa’amoemoe, le fa’anoanoaga ma le to’atasi ua tata’i atu aga’i i lenā koluse mamā o i le mauga, male iloaina o lo’o i ai se tasi e liliu atu i ai. O le koluse tu sa’o, sa avefa ma fa’ailoga o le māasiasi ma le fa’alumaina, ua avefa o se auala o le kalasia fa’amaloloina. O le la’au o le oti ua avefa ma la’au o le manumalō.

O le faitauga muamua ua ta’u maia iā i tatou pe fa’apefea iā Isaraelu o se malō sa lē usita’ia le Tulafono a le Atua ma ulagia lona alofa. Sa latou talepe le feagaiga ma aumai le fa’aleagaina o la latou malumalu ma le ‘a’ai. O le tele o talosaga ina ia salamō ma fa’aleleia o latou ala, faia e ala atu i perofeta, sa lē amana’iaina. Ae, na o’o lava i o latou taimi pogisā tele o le fa’aunu’ua, e le’i fa’agaloina i latou e le Atua ae na tauvala’au pea i latou ia toe fo’i mai. O lo latou tala’aga o se fa’amanatu a’ia’i o mea na tutupu pe a tatou mumusu e talia ma te’ea le alofa o le Atua. E tatau fo’i ona tatou maitauina tatou te feagai atu fo’i ma le filifiliga o le taliaina po o le te’ea o le alofa ole Atua e sili atu lona malosi i lo le oti. A tatou tineia lona agalelei ua tatou tu’uina i tatou lava i le fa’aletonu po o le vavae’eseina mai i tatou ma ia. E fa’aaloalo le Atua i o tatou sa’olotoga fa’aletagata ma e lē fa’amalosia maia lona alofa pe a tatou lē mana’omiaina. Atonu tatou te lē taliaina lona alofa ma te’ea ana mealofa. E mafai fo’i mo i tatou ona tu’ua le alofa ale Atua mo le pogisā o le agasala ma vavae’eseina mai i tatou mai iā ia e fa’avavau.

A o tatou aga’i atu i le ogatotonu o tatou vaitau o le Fagafulu o se taimi e toe va’ava’ai ai i fa’ai’uga fa’amata’u ma fesiligia po o tatou olaga o ni tali atu ma le fiafia i le alofa o le Atua. Pe o mauaina e lona alofa ni fa’aaliga i auala o lo’o tatou ola ai? O a mea o lo’o tatou faia e aumai ai le alofa o le Atua i olaga o a tatou fa’auō? Fagafulu o se vala’au ina ia savali ‘ese mai ala o le pogisā aga’i atu i le malamalama a Keriso.

Aso Sa Lima – Vaitau o le Fagafulu

O faitauga uma ua fa’asino iā latou ala ‘ese’ese aga’i atu i puapuagā ma le maliu o Keriso. Ua ta’u mai e Ieremia se tagata luitaia ua mafatia ua aga’i atu i le fa’aunu’ua o se fa’asalaga mo le solia o le feagaiga tuai, o le a lē lagooni e le Atua i latou. Sa ia valo’iaina se taimi o le a fausia ai e le Atua se mafutaga fou a tagata Isaraelu, fa’avae i le alofa ma le fa’aaloalo fa’aletagata. O le a tu’uina e le Atua le loto ma se agaga fou i ona tagata. O lenei ua fa’a’autū muamua ai la tatou va’ai i le afiafi o le Aso Tofi Pa’ia, le po i luma atu o le maliu a Keriso, ina ua, si’i a’e le ipu, na fa’ailoa atu e Keriso le feagaiga fou i lona toto, e fa’amaligiina mo le fa’amagaloina o agasala.

O le faitauga lona lua ua ta’u maia iā i tatou ona ua puapuaga Iesu ma tatalo ma loimata ina ia fa’asao o ia mai le oti, e mafai ona mutimutivale o ia mo a tatou puapuagā ma fesoasao ina ia tatou tuputupu a’e i lo le nuti palaina e ia tigā. Ua iloa e Iesu o tatou puapuagā, ma ua mafatia ona o a tatou mafatiaga ma puapuagā ma ‘ai’oi i le Atua le Tamā mo tatou. I le evagelia ua fa’aleo tele mai e Keriso ona mafaufauga ma fa’aali mai ai le inoino mo le fa’aletonu tele i ona luma. O lona agaga ua fa’aletonu i le manatu atu i Kalevalio ma na fa’aosoosoina o ia e tatalo mo le ave’eseina mai ai o ia. Ae ui i lea, e lē mafai ona ia talosaga atu ina ia fa’asaoina mai puapuagā ona o le malō ale Atua o le a

Aso Sa Tolu – Vaitau o le Fagafulu

sau e ala mai i le fa'akoluseina ma le maliu. O lona taimi tele o le fa'atinagaga tele o le a sau pe a si'i atu o ia i luga o le koluse ma lima fa'aloaloa e fa'amaopo maia le lalolagi. Keriso i luga o le koluse ua fa'aalia maia iā i tatou le loloto o le leaga ua gafatia e tatou o tagata ola ma le maualuga o le alofa ua vala'auina ai i tatou. O Kerisiano uma ua vala'auina ina ia ola ai puapuagā o Iesu Keriso i o latou lava olaga. E leai se tasi ua sao mai ona puapuagatia. E leai nisi e tauaveina ni pale i le lagi e le'i amoina koluse i le lalolagi nei. O le mulimuli ia Keriso o lona uiga ua savalia o le auala e tasi, tu'uina atu o tatou ola, ma tu'ua mea uma atoatoa i lima o le Atua le Tamā.

Ina ia mauaina uma e tagata lenei fe'au, sa fa'aogaina e Iesu se fa'ata'ita'iga mai le lalolagi o natura. O tatou olaga, e pei o Keriso, e tatau ona pei o le fatu ua pa'ū i le 'ele'ele ina ia fua mai se ola fou. O le fatu ua mate i le 'ele'ele ua fa'ailoa mai ai pe fa'apefea ona tatou oti i o tatou manatu fa'apito ae tatou te le'i amata ona ola ai le olaga a Keriso. Fa'atoā sau se tasi i se olaga maoa'e pe a oti o ia i se ola e itiiti. Aua ne'i fa'agaloina o tatou o fatu a le Atua, se vaega o lana seleselega e fa'avavau. A valaa'u mai Iesu ua tauofoga i tatou e o atu ma oti ma tu'u atu i le oti i totonu o tatou mea ua tete'e atu i le ola moni. Ua fa'aali mai e Keriso o le ola ma le oti o ni vaega o fuafuaga ale Atua mo i tatou. O le tanuina i le 'ele'ele o lona uiga 'alo'ese mai le agasala, talia puapuagā ma ola ai mo isi. I nofoaga uma ma i loto uma o le tauiviga i le va o le tevelo ma le lelei o lo'o fa'atasi pea ma i tatou. O le ala i le koluse e amata i o tatou lava faitoto'a ma ua lu'itauina ai i tatou ina ia mulimuli i ona ala. A o aga'i mai le Paseka e tatau ona toe fa'afou o tatou taumafaiga e vavae'ese atu ai ufiufi o le agasala ale tagata ua auala mai ai satani ma le malosi o le tevelo i o tatou olaga.

Aso Sa o le Palema – Puapuaga o le Ali'i

10

O le Aso Sa o le Palema o le amataga o le Vaiaso Pa'ia ma o se aso mamalu ma le fa'alavelave olo'o lata mai. O le va'aiga ua fa'atulaga ma Iesu o lo'o faia lana malaga o le manumalō mai Petania aga'i atu i Ierusalem, le nofoaga na mata mai ai le gaiogiga mulimuli, o le a aumaia mea uma lava fa'atasi e ala i lona maliu, fa'akoluseina o se pagotā i luga o le koluse. O le va'aia o Keriso o ti'eti'e atu i Ierusalem i luga o se asini ma tagata o lo'o si'i a'e a latou lau pama ma alaga atu 'Hosana' ma folafolaina o ia o se Tupu, na faia le motu o tagata na potopoto mo le fiafia, malolō ma le ofo. Sa latou lē iloaina o le fiafia o le a vave ona saluina 'ese. E le'i umi, a o liliu atu le manumalō i le fa'alavelave, o na laupama na va'aia ai le fa'atusa o se koluse ma le hosana na aveva ma tauvala'au mo lona maliu.

Vaiaso Pa'ia o se taimi pa'ia tele o le tausaga fa'alelotu. Ua fa'ailoa mai ai taimi maualuga o le alofa a Keriso mo i tatou, aumai iā i tatou se avanoa e va'ai ai i o tatou olaga ma talia le matafaioi mo a tatou agasala. O le tala i puapuagā ua fa'aali mai ai ua fa'amanino mai ai mea mulimuli na tutupu i le soifuaga a Iesu ma fa'amanino mai ai le tau sa ia totogiina mo a tatou agasala. Sa fa'alataina o ia e Iuta, fa'afitia e Peteru ma tu'ua e latou uma. I le tu'ua ai na o ia, sa ia 'a'apa atu mo se fa'auō ma le lagolagosua mai le Tamā ae ua leai se mea e fa'amafanafanaina ai o ia: 'Lo'u Atua e, lo'u Atua e, aiseā ua e tu'ulafoa'ina ai a'u?' O lona maliu i luga o le koluse ua fa'amanatu mai ai iā i tatou o lo'o i ai se Atua o lo'o tatou faimalaga atu i ai ma o lana fa'auō ua tatou sa'ilia. O Kerisiano uma ua iloaina o lona lava ia olaga e tatau ona ia feiloa'i atu i le i'uga e pei o Iesu. E tatau ona 'au atu i puapuagā a Keriso ma le maliu ina ia fa'asoa ai i lona mamalu. O le auala atu i le olaga e fa'avavau e lē 'alo 'ese ma le mauga o Kalevalio. O la tatou manumalō, e pei o le manumalō a Keriso, ua na o le koluse e sau mai ai.

O le vaiaso mulimuli o le Fagafulu ua ofoina maia iā i tatou se avanoa e aumai ai o tatou loto ma mafaufau i le lagimalie ma Keriso. Faia se taumafaiga fa'apitoa e 'au atu ai i saunigā lotu ua fa'ailoga ai taimi mulimuli o puapuagā o le soifua o le Fa'aola. Fa'alogi i le tala ole pasio i se agaga o tatalo ma fa'amaopo mai lana fe'au. E leai se aoga i le fa'amafanafanaina o tatou lava i le manatu o ni vaega Iutaia i le 2, 000 tausaga talu ai sa fa'akoluseina Keriso. O tatou uma ta'ito'atasi sa i ai se sao i lona maliu ona o foliga a Keriso ua fa'aleagaina ma fa'amā'ila e le sauā ma manu'aga sa tatou fa'atupuina i o tatou tuā'oi. A tatou fa'amaoni, e mafai ona tatou va'aia ni fa'apaologa o tatou lava iā i latou uma

Aso Sa Tolu – Vaitau o le Fagafulu

sa tu'uina atu Iesu i le oti. O Peteru ma Iuta, Pilato ma le au fitafita e tatau ona mafua ai iā i tatou ona tomanatu i le fa'alata ma le tevelo o lo'o moe i totonu o tatou uma. E leai ma se isi e mafai ona mulimuli atu ia Iesu e ala atu i le sauniga o le Vaiaso Pa'ia e aunoa ma le moni o lo'o tafa mai ai āta fou i o tatou loto. O le moni lava o le Atua e alofa iā i tatou uma lava i se alofa o lona tau o le maliu i luga o le koluse.

Aso Sa o le Eseta – O le Toetū a lo tatou Ali'i

O le Aso Sa o le Eseta o se aso o le fa'atuatua, olioli ma le fiafia. O le toetu o Keriso o le ma'a tulimanu lea a lo tatou fa'atuatuga ma se mea maoa'e tele na tupu i le tala'aga a le tagata. Mo Kerisiano e leai se isi aso e fa'atusatusa ma le Aso o le Eseta. O le aso moni lenei a le Ali'i. O tatou fa'amoemoega uma ma fiafiaga ua sau mai le mea na tupu i le taeao muamua o le Eseta. O se miti ua moni. Ona o le mana a le Atua na ta'avale 'ese ai le ma'a, matala le tu'ugamau ua maua ua leai se isi o i ai. Ua toetu manumalo Iesu Keriso mai le oti. E leai se mea e toe tutusa ona o le fa'asologa o le olaga a le tagata ua lē toe fa'amutaina e le ta'amilosaga a le fanau aga'i atu i le maliu i lenei lalolagi. Tigā, mafatiaga ma fa'anoanoaga ua tulei i le nofoaga lona lua o se lumana'i atoa fou, tumu i le fa'amoemoe ma le olioli a le olaga e fa'avavau, ua tatala mai mo i tatou i tua atu o le tu'ugamau. Ua olioli le lagi ma le lalolagi i le patipatia o le manumalo a Keriso i le oti mo le tagata. Ua faia e le Atua lona alofa mo i tatou ma le mautinoa.

Ua pu'epu'eina e le evagelia le fiafia ale au so'o i lenā taeao muamua o le Eseta. Ua aumaia iā i tatou se va'aiga i lo latou fiafia fou a o latou fa'avavevave atu, tala'i ma fa'ailoa atu le Tala Lelei. O latou loto ua tumu i lenā fiafia o le avea ma tagata ale Atua. O le fiafia ale au aposetolo i le Aso o le Eseta o lona uiga ia avea ma o tatou fiafiaga fo'i. O se fua fou fa'atatau ua ulufia o tatou olaga ona o tatou ua fa'apena ona tu'uina mai i ai lenei folafolaga susulu o le ola e fa'avavau. O le olaga o le Eseta o lona uiga o le fiafiaga o le toe fanau i le Agaga o le Atua ma tatou te lē toe fa'atali mo le isi olaga e patipatia ai. O le olaga o le Eseta o le taimi nei. Tatou te olioli a o tatou mailoaina tatou te lē o savalia le ala o le olaga na o tatou. O lo'o fa'atasi Keriso ma i tatou uma i le faigamalaga a lo tatou Fa'aola, lo tatou Togiola ma lo tatou Fa'aleleia. O lo'o i ai i'ina e fesoasaoni iā i tatou, fa'amalosi'au iā i tatou ma fa'amalosi'ia i tatou mo galuega uma o lenei olaga.

Eseta o lona uiga atoa o le fa'afouina o le olaga iā Keriso. O le ola toetū a Keriso ua mo tatou e aveina. O le paoa o le alofa fa'atasi ma le alofa ale Atua o lo'o i totonu o tatou ma e mafai ona tatou tauavea i ai o tatou olaga. O tatou uma ta'ito'atasi ua tu'uina atu i ai ma le fa'atuatuga le fe'au a le Tala Lelei o le alofa ale Atua. O le sulufaga o le asō ua tatou mauaina mai ai se avanoa fou o le feagai ma i tatou lava fa'atasi ma mataupu o a tatou toetū. Ua tu'uina mai iā i tatou se lu'itau o le fa'asalalauina ole malamalama ma le ola a le Keriso Toetu. Po o tatou ola ai iā Keriso fa'atasi ma le Ali'i Toetū, mau a'a lelei i o tatou loto ma gaioga, po o tatou ola ai pea i se uiga o le manatu fa'apito? E leai se tāua fa'aleagaga o le Eseta mo i tatou pe afai ua tu'ua e Keriso lona tu'ugamau ma o lo'o tatou ta'o'oto pea i le oti i o tatou tu'ugamau. Afai o tatou o tagata moni a le Atua, o latou o lo'o sa'ili mo le uiga o le olaga o le a mauaina mai iā i tatou o Keriso o le ala aga'i atu i le aiga, le nofoaga mo malōlōga mo latou e loto mafatia. Le Ali'i e, o matou o ou tagata. Tatala o matou loto i lenei Aso o le Eseta ma fa'ateleina le mealofa o lou ola i totonu o matou.

O Ioane i Faitauga

I le vaitau o le Fagafulu ma le Eseta, ua liliu atu le Ekalesia i le evagelia a Ioane i le tele o ana sauniga mo le folafolaina o le Upu a le Atua. O le evagelia lona fa o se puna'oa talafeagai mo metitasio tatalo i le misitelio o le Paseka ua patipatia i nei vaitau o le Kalena a le Ekalesia.

Aso Sa Tolu – Vaitau o le Fagafulu

Fagafulu

O tala ma fa'atusa mai le evagelia a Ioane ua aumaia se vaega ta'ua i le Sauniga o le Su'esu'eina ma Sauniga o Fa'aulufale Kerisiano o Tagata Matutua i le Aso Sa tolu, fā ma le lima o le Fagafulu. O le tala i le fafine Samaria i le vai 'eli (4: 5 – 42) folafolaina o Iesu o le tasi ua ofoina atu vai ola ma fa'amalieina ai o tatou galala loloto ma le fia inu. O le fa'amatalaga o le fa'amalologa o le ali'i na fa-nau mai e tauaso (9: 1 – 41) ua fa'amanatu mai iā i tatou o Iesu o le 'malamalama moni o le lalolagi' (9: 5; 8: 12), le tasi ua fa'amaloloina o tatou tauaso fa'aleagaga. Ma o le tala mata'ina o le toe fa'atuina mai o Lasalo (11: 1 – 45) mai le oti ua fa'aalia mai ai o Iesu o le 'toetū ma le ola' (9: 25). O nei filifiliga e mai le ta'amilosaga 'A' a faitauga a le Ekalesia (e ui e mafai ona faitauina i so'o se tausaga i palisi ua fa'aulufale maia i latou ua sauni atu mo le fa'aulufale mai i le Ekalesia.

Tausaga B (le tausaga lenei) ua ofoina mai se isi vaega o faitauga o le Fagafulu mai le evagelia lona fa. I le aso Sa tolu o le Fagafulu, ua tatou fa'alogoa ai i le fa'amatalaga o le 'fa'amamāina e Iesu o le Malumalu i Ierusalem (2: 13 – 25). E uiga 'ese i le evagelia a Ioane o le aumai o lenei tala i le amataga o le 'au'aunaga lautele a Iesu. E pei ona i ai, sa galue o se tala Epifania: o Iesu – e lē o le lavelave o le Malumalu – o lo'o afio ai atoatoa le Atua ma e ala atu i ai e mafai ona maua ai se feiloa'iga ma le Atua (cf. 4: 23 – 24). E le gata i lea, o le fa'amatalaga a Ioane i le fa'amamaina o le Malumalu ua fa'asino tonu i le koluse a Iesu ma le toetū. O le ma'elegā a Iesu e fa'aali le alofa o le Atua 'o le a 'aina' ai o ia (2: 17); o lona uiga, 'o Iesu ua alofa i ona tagata' (13!). O le a ia toe 'faia lenei malumalu,' le malumalu o lona tino, i le aso tolu (2: 19 – 20). O le mea lea na mua'i fa'atusa i ai e Iesu ana a'oa'oga, na fa'ailoaina mulimuli i le Lauga o le Leoleo Mamoe, ua ia tu'uina atu lona ola ma toe aveina i lugā.

12

O faitauga mai le aso Sa e mulimuli mai (3: 14 – 21) o lo'o maua i ai ni vaega autū o ni teuteuga a Ioane, fa'apea se laina ta'uta'ua tele o lenei evagelia: Auā ua fa'apea lava ona alofa mai le Atua i le lalolagi, ua ia aumai ai lona Atali'i e to'atasi' (3: 16). O le Liutino Tagata o Iesu na sau mai le vai papiso o le alofa o le Atua ma o se *mealofa* a le Atua. E mafai ona fa'aali e Iesu le alofa o le Atua ona o ia o le Alo o le Tagata ua sau mai le lagi (3: 13). Ua fa'ataua lea i upu amata a le evagelia: Sa i le amataga le Upu, sa i le Atua le Upu, o le Atua fo'i le Upu (1:1). O le fa'aupuga ua fa'aliliuina 'sa fa'atasi ma le Atua' o lona uiga 'liliu atu i le Atua.' Ua toe manatua ai le mafutaga mafana a le Alo ma le Atua, le feagaiga e fefa'afesaga'i, a o le Upu o lo'o i le fatafata o le Tamā (1: 18).

Ua fa'aalia e Iesu le alofa mata'utia ale Atua i le 'si'itia i luga' (3: 14). O le ulua'i fa'amatalaga lenei a Ioane o le valo'aga o puapuagā. O le fa'amatalaga o le 'si'itia i luga,' e pei ona fa'aogaina e Ioane, o lo'o tumu i uiga. Ua fa'ailoa mai ai le si'i a'e o Iesu i luga o le koluse, e tutusa ma le si'iina e Mose o le gata u'amea i le togāva'o o se punavai mo fa'amalologa (3: 14; Numera 21: 8 – 9). Ae ua fa'asino fo'i iā Iesu ua si'itia a'e mai le maliu ma olioli i le afio ai o le Atua. Mo Ioane, o le koluse a Iesu, lona toetu ma le fa'aeaina o ni mea tutupu ua fa'aauuina o ni fa'aaliga o le alofa o le Atua mo le mafuaga o le foa'iina o le ola.

O le faitauga o le evagelia o le aso Sa Lima (12: 20 – 33) ua fa'atulaga ai i le i'uga o le tala'iga a Iesu, ua fa'ailoa mai le 'itula' ua taunu'u (12: 23). O le 'itula' a Iesu ua fa'ailoa mai ai le taimi o lona 'mamalu,' aga'i atu i le tu'uina atu o lona ola i luga o le koluse, mai lona toetū ma lona fa'aeaina. Ua ia fa'amatalaina le fa'ata'oto o le fatu e tatau ona mate ina ia maua mai ni fua (12: 24). O le maliu ma le toetū o Iesu ua fa'avae ai se fa'apotopotoga o so'o na fa'aaloaloina le Tamā i le 'au'auna atu iā te ia i le alofa – foa'i. Ona sau ai lea o isi va'aiga tulaga 'ese o le evagelia lona fa. E lē o aumaia e Ioane se fa'amatalaga o tigā a Iesu i le togāla'au i luma atu o lona maliu. O lona fa'amatalaga o 'puapuagā' na tupu i le alafua lea. Ae o Iesu na 'alo'ese mai le tatalo, 'Tamā, fa'aola mai iā te a'u i lenei itū aso' (12: 27). Ae, sa ia tatalo, 'Lo'u Tamā e, ia e tu'uina atu le mamalu i lou suafa (12: 28). Ma na tali mai ai lea o le Atua i le tatalo a Iesu: "Ua ou tu'uina atu le mamalu, ou te tu'uina atu fo'i i ai le mamalu" (12: 29). O le leo mai le lagi ua aumaia le molimau o le Atua lava sa a'afia vāvālalata i fa'aaliga a Iesu i le alofa mamana e ala i ana upu ma galuega – ma o le Atua lava o le a fa'aauu ona fa'atasi ma Iesu a o ia fa'aalia le anoanoa'i o lona alofa i le ofoina atu o lona ola i luga o le koluse.

O Ioane i Faitauga

O Aso Maliu o le Eseta

O le evagelia fo'i a Ioane ua tele lona sao i sauniga o Aso e Tolu o le Eseta. I se va'aiga muamua, o le faitauga o le evagelia mo le Misasa o le Tausama'aga Mulimuli i le Aso Tofi Pa'ia ua va'aia o se fili-filiga fa'apitoa. I le sauniga ua tatou patipatia (po o se vaega) o le mealofa a Iesu o le Eukalisitia i le Ekalesia, o le evagelia ua folafolaina le tala a Ioane o le tausama'aga mulimuli' (13: 1 – 15), pau lea le evagelia e lē a'afia ai upu a Iesu i luga o le falaoa ma le uaina (ae o le faitauga lona lua 1 Korinito 11: 23 – 26, e a'afia ai nei upu). Ae ui lea, o le faitauina o le evagelia a Ioane i le Aso Tofi Paia- ua fa'a'autū i le mulumuluina e Iesu o vae a ona so'o – ua ofoina maia se fa'amatalaga taūa i le mealofa o le Eukalisitia.

O fuaiupu amata a le tala a Ioane o le Tausama'aga Mulimuli ua fa'amanino mai ai o mea o le a fa'ailoa mai mulimuli mai le evagelia o se fa'amatalaga o le alofa a Iesu. Ina ua fai mai Ioane o Iesu e alofa *eis telos*, o lo'o fa'apea mai aga'i atu i le i'uga' o lona olaga (13: 1): E le'i taofia mai lava e Iesu le vaega i le fa'aalia o le alofa o le Atua. Ioe, o le fa'agaioiga o le mulumuluina o vae ua fa'ailoga ai le mealofa na ofoina atu e Iesu i le alofa. O le mafua'aga lenā sa ia fa'atonuina ai Peteru, ina ia maua se 'fa'asoa' po o se tofi fa'atasi ma ia, e tatau ia Peteru ona talia mea ua ia ofoina atu i ai (13: 8). E lē gata i lea, o le mulumuluina o vae o lo'o i ai se faiga fa'atusa. I le tatalaina 'ese o ona ofu pito i tua ma ta'ai se solo i lona sulugatiti, sa ofu o se pologa ma faia le galuega o le mulumuluina ma solo mago vae a ona so'o (se'i manatu i tulaga o a latou vae!) Ona a'oa'o atu lea e Iesu o latou e mulimuli atu iā te ia e tatau ona faia fa'apea (13: 14 – 15). O le mealofa o le Eukalisitia ua vala'auina ma fa'amalosia i tatou e savali i auala a Iesu o le agaga mauualalo, alofa foa'i fua atu ma le 'au'aunaga.

O le fa'amatalaga a Ioane o le pasio ua folafolaina i le Sauniga o le Aso Faraile Pa'ia. I nisi o va'aiga o le upu 'pasio' e lē talafeagai, ona i le tala atoa ua fa'amamafa mai ai e Ioane na alu Iesu i lona maliu ma le loto atoa ma sa ia pulea o mea uma na fa'aalia. O se fa'ata'ita'iga o lenei va'aiga fa'a- Ioane ina ua o mai fitafita ma leoleo e saisai Iesu. O lana alaga atu 'O A'u lenei' ona solomuli ai lea o i latou, ua pa'u'ū i le 'ele'ele' (18: 5 – 6). Ua tu'uina mai e Ioane se va'aiga o le Atua i le amataga o le tala a Iesu ua tu'uina atu i le oti. O le fa'amatalaga na puipui Iesu i ona so'o (18: 8) ua fa'aalia ai o ia o lo'o fa'ataunu'uina lana matafaioi o le Leoleo Mamoe Lelei e lē tu'uina atu ana mamoe ina ia fa'oia (10: 28).

O le vaega ogatotonu o le tala a Ioane i puapuagā a Iesu o le fa'amasinoga i luma o Pilato (18: 28 – 19: 16) Ua tu'uina mai e Ioane ni fuaiupu e tolusefulu – iva i lenei va'aiga (i le fa'atusatusa atu i fuaiupu e sefululima a Mareko). O le tala atoa o se fa'ata'ita'iga tele o le taufa'alili a Ioane ona o Pilato – o le fa'amasino ma le kovana ua fai ma sui o le malosi ale tupu a Roma – ua fa'aalia o ia o lo'o fa'amasinoina, a o Iesu ua fa'aalia o le tupu moni ma le fa'amasino. Ina ua tu'uina atu e Pilato Iesu, la'ei i se ofu lanu violē ma le pale tuitui i lona ulu ma upu nei *Ecce homo* ("fa'auta i le tagata!": 19: 5), sa ia molimau ma le lē iloa o Iesu o le Mesia/Tupu, o se Alo o le Tagata', ua ia si'itia i luga ina ia maua e tagata uma e talitonu iā ia le ola e fa'avavau. Ona o se tasi na fanau ma sau i lenei lalolagi 'ina ia molimau i le moni' (18: 37) – ina ia fa'aali le Atua ma le alofa ale Atua – o Iesu o le fa'amasi-no mulimuli o le maliu, fa'amasinoga ma le taunu'uga mulimuli. Sa faia e Pilato le sili atu i lo o lona iloa ina ua ia fa'anofoina Iesu i le nofoa fa'amasino (19: 13).

O le isi va'aiga uiga 'ese i le tala a Ioane o fa'amatalaga na amoina e Iesu lana koluse na o ia (19: 17). E leai se Simiona o Kurene e fesoasaoni. E fa'apea fo'i iā Ioane ua na o Iesu e tufatufaina le falaoa na fa'ateleina i le motu o tagata (6: 11), o i'inei la o le va'ai 'autū ua na 'o Iesu ma lana taulaga na ofoina atu i lona alofa. Ua ta'u maia e Ioane le tala o le fa'akoluseina ma le anoanoa'i o le amio lelei ma le tamā o aiga. E lē o ta'ua le tauemu, o se gasetoto o le masina, se mafui'e po o le sae'eseina o pupuni o le malumalu. Ua taofiofi e Iesu lona mamalu ma le pule o lona loto i lea taimi atoa, e pei ona molimauina i ana upu, o nei mea uma e tulaga 'ese i fa'amatalaga a Ioane.

O upu a Iesu i lona tinā (Sena e, fa'auta, o lau tama; 19: 26) ma i le so'o alofagia (Fa'auta, o lou tinā; 19: 27) fa'ailoa mai ai le aiga fou o le fa'atuatua ua aumai i le i ai i le 'itula' a Iesu. O le tinā a Iesu o le tasi na mua'i fa'aosoina lana 'fa'ailoga' tele muamua, suia o le vai i le uaina i le fa'aipoipoga i Kana (2: 1 – 11). O le so'o pele o le tasi lea, i le Tausama'aga Mulimuli, na 'ta'oto i le fatafata a Ie-

O Ioane i Faitauga

su' (13: 23). E mautinoa lava e lē o se fa'afuase'ia ua iā Ioane nei va'aiga o ni tagata e lua o lo'o tutū i lalo o le koluse, le mea na sasa'a mai ai le toto ma le vai mai le fatu tuia a Iesu, fa'ailogaina o le mealofa o le Papatísoga ma le Eukalísitia (19: 34).

O upu sa soso'o ai mai iā Iesu 'ua ou fia inu' (19: 28). E lē pei o fa'amatalaga a isi evagelia o i'inei na faia ai e Iesu le fuafuaga i le talosaga atu mo se vai. Ua ia fa'aalia mai o ia lava ua manatu atoatoa lava e inuina le ipu na tu'uina atu e le Tamā (18: 11). Ona o le Alo Alofagia, o mea 'ai e Iesu sa masani ona va'aia o le faia o le finagalo o le Atua (4: 34). O upu mulimuli a Iesu, 'Ua uma (19: 30) ua fa'aali ai lona mautinoa ua ia fa'ataunu'uina lana misiona. Ua fa'ailoa mai ai le manumalō, e lē o le pagatia ma le to'ilalo. Ona gau ifo ai lea o le ulu a Iesu ma tu'uina atu 'lona Agaga'. O Iesu na tu'uina atu lona ola mo ana mamoe. E pei ona fa'amaninoina mulimuli mai, o le atoaga o le itula o le a i'u ai i le fa'ae'eina o le Agaga, le vai ola e tafe mai le fatu o le Mesia fa'akoluseina ma na toetū mai (7: 37 – 39).

E pei ona fai mai Ioane, o le maliu a Iesu e le'i tupu i le aso o le Paseka lava ia, ae i le Aso o le Sauniuniga, i le itula ina ua fasi taulaga i mamoe o le Paseka fa'atasi ai ma fa'amatalaga o ona vae e le'i gauia e fitafita sa va'aia lona fa'akoluseina (19: 33, cf. Esoto 12: 46). O le mea lea, e lē gata o Iesu o le Leoleo Mamoe Lelei; ae o ia fo'i, e pei ona fa'ailoa mai e Ioane le Papatísoga i le amataga o lana tala, 'o le Mamoe ale Atua, o lē ua ave'eseina agasala a le lalolagi.

Eseta

Ua fa'auau e le evagelia a Ioane ona fa'atosiga Vaitau o le Eseta. O se va'aiga ofoofogia o le sauniga i le aso Sa o le Eseta o le faitauga o le evagelia e lē a'afia ai le va'aia o Iesu Toetū. Ae o le tala o le tu'ugamau ua leai se isi ua folafolaina (20: 1 – 9). O le fa'amatalaga a Ioane (ose filifiliga mo le tolu tausaga) ua fa'asoa ma isi le fa'ailoga va'aia o le taeao pogisā na fua mai ai le tafa o āta ma le fa'amatalaga o le ma'a sa tapunia ai le tu'ugamau ua fuli 'ese (o le leo fa'atalafu ua fa'ailoa mai ai gaioiga mamana). Se tasi o fa'amatalaga e uiga 'ese i le tala a Ioane e ao ona maitauina. Ua ia fa'amaumauina o 'ie na ta'ai ai Iesu ina ua tanuina sa ta'atitia ai i le tu'ugamau, ma le 'ie sa ufiufi ai lona āo ua tā'ai'ai. (20: 6 – 7). O lo'o fa'ailoa mai e Ioane, e lē pei o Lasalo na sau mai le tu'ugamau o lo'o saisaitia pea i 'ie na tanu ai (11: 44), ua lē toe i ai se malosi a le oti, pe mafai ona toe fa'amalosi mai, se paoa iā Iesu Toetū, o ia o le 'toetū ma le ola' (11: 27).

Ina ia mautinoa, Aso Sa o le Eseta o se patipatia mo le *valu* – aso o le a fa'alogoina ai tala 'ese'ese o fa'aaliga mai le evagelia e fa'ua faitauina. O se taimi taualuga fa'aevagelia, folafolaina i le aso Sa Lua o le Eseta, o le va'aia fa'alua lea o Iesu – e va ile vaiaso e tasi – e ona so'o i le potu i luga, e pei ona fa'amatala e Ioane (20: 19 – 31). Afai e lē mafai ona pulea e le oti le Iesu toetū, ona mautinoa lea o faitoto'a ua lokaina e lē o ni fa'alavelave (20: 19, 26). O Iesu toetū ua foa'i atu i ona so'o le mealofa o le filemū, *shalom*, ua fa'ataunu'uina ai le folafolaga sa ia faia i le Tausama'aga Mulimuli (14: 27). Ona mānava atu lea o Iesu iā i latou e foa'i atu i ai le Agaga Pa'ia, le fesoasoani na folafolaina (14: 16). O gaioiga a Iesu i'inei ua fa'aoso ai le mānava ola a le Atua i le ulua'i tagata ola (Kenese 2: 7); ioe, o le mealofa o le Agaga ua aumaia se fanau fouina 'mai lugā' (3: 3). E lē gata i lea, o lenei ua auina atu e Iesu ona so'o i se tala'iga, se tasi o le a fa'ailogaina e le fa'amagaloina o agasala. Mo Ioane, o le Eseta ma le Penetekoso o ni feso'ota'iga (o le mea moni lava, o le faitauga o le evagelia mo le Aso Sa o le Penetekoso o Ioane 20: 19 – 23).

O le aso Sa Lua o le Eseta o le aso Sa fo'i o le Agalofa Mamana. O i'inei e va'aia ai le tagata o Toma i le (20: 24 – 29). Sa lē i ai o ia i le taimi muamua na fa'aali ai Iesu i le potu i luga i le 'au so'o. A o fa'amatalaina Toma o le 'Masalosalo', e tatau fo'i ona fa'ailoa lelei o mea sa ia mana'o i ai – o le va'ai i lima ma le itū a Iesu (20: 25) – le mea tonu na tu'uina atu i isi so'o (20: 20). O Iesu toetu ua fa'alua nei ona va'aia ma, i lona alofa lē fa'atua'oia, avatu le mana'oga a Toma. Ona avatu lea o le fa'aaloalo iā Toma e fa'ailoa atoa mai ai lona fa'atutua o lo'o tusia i evagelia: 'Lo'u Ali'i e ma lo'u Atua!' (20: 28). O upu a Iesu o fa'amanuiaga e uiga iā i latou e talitonu ae lē va'ai e lē o se faitioina o Toma. E le gata i lea, ua fa'aalia mai ai le alofa tunoa a Iesu ua fa'auau pea i augatupulaga uma, fa'apea tatou. E ui o tatou e lē o ni molimau fa'aeaina a Iesu toetu, e lē o afaina i tatou; o le mealofa a

O Ioane i Faitauga

le Agaga ma le tala'iga ua ia foa'i mai o a tatou fo'i ia.

O le aso Fa o le Eseta ua lauiloaina o le Aso Sa o le Leoleo Mamoe Lelei. Ua tatou va'aia o Iesu o se Leoleo Mamoe Lelei ua foa'i lona ola, i le alofa, mo ana mamoe. O le fa'aogaina e Iesu o le fa'atusa o le leoleo mamoe e pei ona fa'ailoa mai e le Salamo 23. Ua fa'amanino mai e Ioane, ae ui i lea, o Iesu e lē gata e ta'ita'ia ana mamoe aga'i atu i le vao lelei; o ia fo'i o le Falaoa o le Ola (6: 35).

O aso Sa e lua o le Eseta ua mulimuli mai, fa'atasi ai ma faitauga mai ia Ioane 15, fa'auau le sini autū o Iesu o le punavai ma lē ua aumaia le ola. I le aso Sa lima ua fa'aali e Iesu o ia o le 'vine' o lo'o galueina lelei e le Tamā (15: 1). Ua ia vala'auina latou o lo'o mulimuli atu iā te ia ina ia 'tumau' ma ia, e pei o ni lālā i se vine. I le faia fa'apea, ua vala'auina e Iesu ona so'o ina ia fa'asoa i le la mafuta-ga mafuta ma lona Tamā; ua ia fa'amanatu atu fo'i iā i latou ua ia fa'anaunau latou te fua tele mai (15: 5). I le aso Sa ono ua fa'auau e Iesu nei sini 'autū, o lenei i le fa'aogaina o mataupu o le fa'auō: Ou te lē toe ta'ua outou o 'au'auna...ua ou ta'ua outou o uō' (15: 15). O Iesu mai le evagelia a Ioane na fa'amatala le tala mai tala o muagagana fa'apea o fa'auō e masani ona fa'asoa mea uma. Ua fa'ailoa atu e Iesu mea uma sa ia fa'alogoa ai mai lona Tamā; e lē gata i lea na te le'i taofia se mea mai ana uō, tu'uina atu o lona lava ia ola (15: 13). O fa'auō a Iesu e tatau fo'i ona faia fa'apea i le alofa atu le tasi i le isi e pei ona ia alofa atu iā i latou. I le faia o lea, o le a latou fua mai ai ni fua e tele.

O le fa'atusa mulimuli a Iesu i luma mai o le Penetekoso, i le aso Sa fitu o le Eseta, o Iesu o lo'o tatalo mo ona so'o (17: 11 – 19). O le tatalo fa'aositaulaga a Iesu o le isi lea fa'aaliga o lana tausiga o se Leoleo Mamoe Lelei. O i'inei ua ia faia ai ni talosaga se lua. Muamua, ua tatalo Iesu ina ia fiafia ana so'o i le puipuiga ale Atua ina ia avea lo latou tūtū fa'atasi ma le alofa o le tasi i le isi o se molimau va'aia i le tasia'aga i le va o le Tamā ma le Alo (17: 11, 15). Lona lua, ua ia tatalo ina ia fa'apa'aina i latou i le upu moni (17: 17). O le fa'aali o le alofa o le Atua o le a fa'auau pea ona liutino tagata i olaga o so'o a Iesu – ma ile olaga a le Ekalesia.

15

Fa'ai'uga

A o folafolaina evagelia sinopi i le tele o taimi o le kalena o sauniga a le Ekalesia, o le evagelia a Ioane ua sau i luma i le Fagafulu ma le Eseta. O latou o le a faia ni lauga ma tala'iga o le lelei pe a va'ai lelei i sini autū a Ioane ma fa'amamafa le taūa fa'apitoa o a latou sauniuniga e tofitofi le anoano o mealofa ale upu a le Atua i nei vaitau pa'ia.

Faitau mo le Masina o Mati – 2024

Aso 3 Mati Aso Sa 3 Fagafulu – Faitauga muamua – Esoto 20: 1 – 17. Matua: Na tu'uina mai e Mose le Tulafono.

Salamo 19: 7 (tali), 8 (tali), 9 (tali), 10 (tali). Tali: Le Ali'i e, o iā te oe upu o le ola fa'avavau.

Faitauga lona lua – 1 Korinito 1: 22 – 25. Matua: Ua matou tala'i atu iā Keriso na fa'asatauroina, o le mea e tausua'i tagata, ae peita'i o ē ua vala'auina, ua fai Keriso ma mana o le Atua.

Fuaiupu mo le Evagelia” Ina salamo ia outou, auā ua latalata mai le malō o le lagi.

Evagelia – Ioane 2: 13 – 25. Matua: Inā lepeti ia o lenei malumalu, ona ou toe faia lea i aso e tolu.

Tofitofiga o le Upu:

Pe ua tatou iloaina tagata tino 'ese e to'alua sa feagai atu i se taua i le taimi a lo tatou Ali'i? Sa tului atu ma avatu le pule malosia ma fa'auau ona taumafai e pulea. O le tasi o nei tagata tino 'ese o le nofoaga OLE MAKETI; o le isi o le FALE A LE TAMĀ. O se taua tuai na toe fa'afouina i le va o le *natura* ma le *natura ofofofia*, o le tagata ma le mamana; o le taua o malō e lua.

Faitau mo le Masina o Mati – 2024

Na fiafia Iesu i le Fale a le Tamā ma ina ua ia va'aia ua fa'aulufale e le Maketi nofoaga pa'ia, ona mimita na fanau mai ma ia na fa'aosofia ai se gaoiiga sauā. O ana sini tonu o le au su'etupe, o a latou galuega o le suia o le tupe Roma i le tupe Iutaia. O pisinisi mo le fa'aolaina o pisinisi, ae lē o le fa'alelotu. I lo tatou malamalama i ai, na gaoi lava na o Iesu, e aunoa ma se fesoasaoni mai o ana Aposetolo. O ana gaoiiga na sa mata'ina ma mautū. E le'i i ai se fetu'una'iga i lenei mataupu.

O nei mataupu o lo'o avea lava ma fetauaiga i nei aso a o tauvā le lalolagi ma le agaga o Keriso. E to'atele ua va'aia le tali a Iesu o se fiailoa, o isi o se tu'uto i mataupu fa'avae. O fa'apefea ona e va'aia lea? Pe o se tupe itiiti i le malumalu e leaga lea?

O le nofoaga o le Maketi ma le Fale a le Tamā e fa'atosiga ma fetosoa'i i tagata uma ta'itasi ma tatou te mulimuli atu i le tasi i lo le isi ma e masani ona taumafai e fetu'utu'una'i i vaega uma ia e lua. Se'i va'ai i le mataupu o le ola. E mafai ona fa'atau mai pe fa'atau atu, pe o lona tau ua sili atu i tau uma? O le maketi o le fa'atinoina, o le Fale a le Tamā e lēai. O le a le tau o lo'o i ai nei i le maketi mo le moni ma le fa'amaoni? Pe o tatau ona fa'atau le feusua'iga mai lē ua fa'atau maia pe afai e i ai sau tupe, pe o nisi o mea e lē fa'atalanoaina pe feutaga'ia? Pe mafai ona e fasiotia se tagata mo se tau? Afai o 'oe e lava lou atamai, pe fa'atagaina ona gaoi se pelaue, se ta'avale po o se to'alua a se tuā'oi, po o nei mea o ni "fefā'ataua'iga" e masani e lē mamā, e pei ona a'oa'oina i le Fale a le Tamā?

O povi ma mamoe, o saga ma vaomago ma le miliona o isi mea e mafai ona fa'atauina i le Nofoga o le maketi ae o le Fale a le Tamā ua fa'asaoina mo tagata e manana'o e sa'ili se filemū ma se atamai loloto a lo latou Atua.

Ua tatou atamamai i auala a le lalolagi ae pe o tatou lelei i le lotu? I le 168 itula tatou te fa'aalu i vaiaso ta'itasi, se tasi ona sili o le fa'aalu i le satualio, o isi i pisinisi a le lalolagi. Atonu o le fa'amatalaga tele lenā i nofoaga o a tatou 'oa ma o tatou loto.

16

Fagafulu o se taimi ua talafeagai e pu'epu'e ai se aloiafi mai le ma'elega 'a'asa a lo tatou Ali'i. O se vaiata tatau mo le fa'amalamalamaina o tulaga fa'ataūaina. A e sau i le Fale a le Tamā, aua le aumai le Nofoga o le Maketi. Aua le va'aia le falesa o se mea e fa'aumaina ai, ina ia e fo'i atu i mea taūa. Mo le to'atele, ua na o se mapusaga ae i le va o tiute ma e o'o lava i se mapu e toe fa'afouina ai. A e sau e tatalo, tulei 'ese atu manatu e fa'atosiga 'ese. O le taimi pa'ia lenei, ona ua tatou i ai i le Fale ale Ali'i.

Aso 10 Mati Aso Sa 4 Fagafulu – Faitauga muamua – 2 Nofoga 36: 14 – 16, 19 – 23. Matua: Ua latou ula i perofeta, ua o'o ina tupu le to'asa o le Ali'i i lona nu'u, ua o'o ina leai se fofō.

Salamo 137: 1 – 2 Tali), 3 (tali), 4 – 5 (tali), 6 (tali). Tali: Afai ou te lē manatua 'oe, ia pipi'i a'e lo'u laulaufaiva i lo'u gutu

Faitauga lona lua - Efeso 2: 4 – 10. Matua: A o oti lava i tatou i le amio leaga, o le alofa tunoa ua fa'aolaina ai.

Fuaiupu mo le Evagelia: Ua fa'apea lava ona alofa mai le Atua i le lalolagi, ua ia aumai ai lona Atali'i e to'atasi, ina ia maua le ola fa'avavau e i latou uma o e fa'atuatua iā te ia.

Evagelia – 3: 14 – 21. Matua: Ua fa'apea lava ona alofa mai le Atua i le lalolagi, ua ia aumai ai lona Atali'i e to'atasi.

Tofitofiga o le Upu:

E tele ni feiloa'iga a Iesu i lona soifuaga atoa ma le au rapi Iutaia. Sa ia fesiligia i latou i totonu o le malumalu ina ua sefululua ona tausaga ma faia se fa'atalanoaga ma isi ina ua matua mai o ia. E to'atele na te'ea o ia ae e tasi na o Nikotemo na taliaina. E le o ia o se tagata lauilao tele i le Feagaiga Fou ma ua ta'ua na o Ioane ae e va'aia i taimi 'ese'ese i le soifuaga ale Ali'i. O ia o le tasi na fesilisili na sau i le po e fa'aali lona fa'atuatua ia Iesu ma fesili atu e uiga i le ola e fa'avavau. Mulimuli ane i le fa'apotopotoga ma ona tagata Israelu, sa ia fautua atu i le tu'ua'ia o Iesu e aunoa ma le mala-

Faitau mo le Masina o Mati – 2024

malama iā te ia. Mulimuli lava sa va'aia o ia i le tu'ugamau ma ni mea fa'amanogi mo le tino ma fesoasaoni ia Iosefo o Arimataia i le tanuina o lo tatou Ali'i.

O le Evagelia o le asō ua maua i ai tali a Iesu i se fesili na tu'uina atu e Nikotemo i lo la ulua'i feiloa'iga. Sa ia mana'o i ni fa'amatalaga e uiga i le papatisoga ma faiga e maua ai le ola e fa'avavau.

Na tali atu ma le manino Iesu i lana fa'auō fou, fa'amatala o le a si'i a'e o ia e pei ona si'i a'e e Mose le gata i le toafa ina ia fa'amaloloina ai tagata. E to'atele ole a fa'amaloloina e le koluse i le faiga lava lea e tasi, na fai atu ai Iesu iā te ia. O le rafi, ona o se Farasaio e atamai tele, na malamalama i fa'aupuga na si'i mai le Tusi o Numerama e le'i masalomia sa tomanatu umi ai i tala fa'atusa.

O lenei aso, o se fa'atusa fa'apea – o se gata po o ni gata ua milosia i le pou – ua tumau o se fa'aailoga va'aia o le fa'amaloloina fa'aletino. O lenei fa'aailoga ua va'aia i falema'i, ta'avale fe'ave ai ma'i ma pepa a le tele o fa'apotopotoga fa'asoifua maloloina. E le mana'omia ona fa'amanatu mai ia i tatou le tele o le a'afiaga a le koluse a Iesu mo fa'amalologa fa'aleagaga.

I le Evagelia a Ioane, ua fa'aali mai ai ua sau Iesu i le lalolagi nei ina ia avea ma tagata atoatoa lava (o le Upu ua avea ma tino). O le vaega muamua lenā o lana tala'iga. O le vaega lona lua o le si'i a'e le tagata i le mamalu e fa'avavau. Na te lē va'aia le oti o le alu i lalo, ae o se alu i luga. O se aga'i atu i luga i lo le pa'ū i le 'ele'ele. O lenei manatu ua fa'atumulia e le fa'atuatua e tataua ona lu'itauina ai i tatou ina ia taupulepule lelei le mea e aga'i i ai pe a tatou maliliu. E pei o Iesu, ua tatou fananau mai o ni tagata ma o lenei ua tatou taumafai e si'i a'e lenā tagata i le mamalu e ala i le toe fanau mai o le papatisoga ma le toso e fa'avavau mai le Fa'aola i luga o le koluse.

I lenei Evagelia, ua fai mai Iesu o le fa'atuatua e ta'ita'ia i le ola e fa'avavau. O le upu Eperu mo le fa'atuatua o le (*emeth*) - *fa'amaoni*. O lona uiga o le malosia, ae o se malosia e fa'avae i le Atua, e lē o le malu a le tagata. O se tala lelei lenei mo Nikotemo ma tatou. Atonu o le oti mo tatou o lona uiga ua na o le to'ilalo. Ua 'ata Iesu ma toe fa'amamafa mai ia tatou mafaufau i ai o se la'asaga atu i luga. O le loloto o a tatou fa'atuatua – o tatou fa'amaoni – o le lelei fo'i lea o le fa'avae ua tatou maua e si'i a'e ai i tatou i luga i le fa'amaloloina mai luga i le mamalu o le Malō.

Aso 17 Mati Aso Sa 5 Fagafulu – Faitauga muamua – Ieremia 31: 31 – 34. Matua: E o' inā ona po ou te osia ai le feagaiga fou ma le aiga o Isaraelu; ou te fa'amagalo iā latou amio leaga.

Salamo 51: 1 – 2 (tali), 10 – 11 (tali), 12 – 13 (tali). Tali: Le Atua e, ia e faia se loto mamā mo a'u.

Faitauga lona lua – Eperu 5: 7 – 9. Matua: Na a'oa'oina o ia ia usiusita'i, ona avea lea o ia ma tupuga o le fa'aolataga fa'avavau.

Fuaiupu mo le Evagelia: A fia 'au'auna mai se tasi iā te a'u, ia mulimuli mai o ia iā te a'u; o le mea ou te i ai a'u, e i ai fo'i la'u 'au'auna.

Evagelia – Ioane 12: 20 – 33. Matua: Afai e pa'ū le fua o le saito i le 'ele'ele ma pala ai, ona fua tele mai ai lea.

Tofitofiga o le Upu:

I le tausaga 1938, i le aso 18 o Iulai, o se pailate e le'i lava sona poto masani e igoa ia Douglas Corrigan, na faimalaga mai i se tama'i va'alele mai se tasi o 'a'ai i Amerika aga'i atu i se tasi o Setete ae mea ane ua sesē aga'i i Aiolani i Peretania. Na fa'aigoaina o ia e niusipepa o le pailate Auala Sesē Corrigan. Tatou te lē mailloaina pe fa'apefea ona fenumia'i lona mafaufau ae ua tatou iloina o tatou uma e faia le anoanoa'i o mea i auala sesē.

Tatou te fa'aalia ni va'aiga itiiti pe a tatou mafaufau ane, ona o isi tagata e lē faia mea i auala ua tatou manana'o ai, ua latou faia i se 'auala sesē. O tagata Eperu ma Saina e tusitusi ma faitau amata mai le itū taumatau aga'i atu i le itū tauagavale. E 'ese ae e lē sesē. E tele nisi faiga e mālīe toe sa'o ua tatou taumafai e fa'atulaga ai o tatou e sa'o

Na ta'u maia e Iesu iā i tatou o ona ala e lē o tatou ala. Sa tele ni mea sa ia faia aga'i i tua – i o tatou mafaufauga – ona o ia o se tagata fa'alavelave. O se fa'alavelave o se va'aiga fa'afeagai, o se mea e

Faitau mo le Masina o Mati – 2024

foliga mai e lē moni ae e moni i se auala e ‘ese. O le a foliga mai, mo se fa’ata’ita’iga, o le fa’aupuga lenei e moni. “O le a ou fiafia tele pe afai ou te ola ai mo a’u lava.” Fai mai Iesu, “Sesē.” Afai e te ola mo ‘oe lava, o le a e lē fiafia ma e fa’anoanoa. A e mana’o e te fiafia, ola mo isi ma oti mo ‘oe lava. O le lesona lenei ua a’oa’oina mai e le Evagelia i le asō. O le fatu e tatau ona pala i le ‘ele’ele ina ia ola ma maua mai ai ni fua.

Atonu sa fa’anoanoa le au Eleni “atamamai” na o mai e talanoa ma Iesu i lenei Evagelia. Sa masani o latou e manino lelei ia i latou lava, sa mauaina se lauiloaina mo le atamai tele. Sa fai mai o ia o latou e valea mo le Atua oni tagata atamamai tele a le Atua. O tagata filifilia a le Atua, le au Iutaia fa’aeaina, sa fa’alogoaina fo’i Iesu o fai mai o tagata filifilia moni o latou ia ua fa’atuatua iā te ia. O le au Roma femitai ma le mana’o i le paoa sa taliē ma tauemu i le fa’aupuga “Ua e malosi ina ua e vaivai.” Ua foliga mai ua fete’ena’i e le Ali’i le tele o mea sa maumaututū ma talitonu i ai tagata. O le a va’aia o se tagata e lē lelei i le va feagai ai fa’alaua’itele, ona ua ia lē taumafai e fa’afiafia ae ua ta’ita’i.

Tatou te manatu ifo e le o gaiou ma faia ni mea aga’i i tua; o tatou. Afai ua tatou manatu ifo ua tatou faia se mea i le auala sa’o ae e le alualu lelei ma ua tatou fa’alogoaina le loto vaivai, atonu e lelei te toe liliu i tua ma va’ai iā te ia. Atonu o lo’o tatou aga’i tonu i le auala sesē.

O tulaga mo le lalolagi nei e ‘ese’ese i lo ia. O ia “O Ia o le Ala.” O nisi ua manatu o ia na o le ala. E masani ona fe’esea’i le tagata Kerisiano ma le lalolagi, a o ia taumafai e ola ai a’oa’oga a Iesu, ona e masani ona va’aia i tatou o faia aga’i i tua – e pei o Ala Sesē a Corrigan. Ae ui i lea, o le Ali’i e le gata o lo’o fa’asino maia le auala sa’o ae o lo’o vala’au mai iā latou o lo’o mulimuli atu iā te ia ma le fa’aupuga lototele “O A’u o le Ala, le Moni ma le Ola.”

18

Aso 24 Mati – Aso Sa o le Palema – Polesesio – Evagelia: Mareko 11: 1 – 10. Matua: Ia manuia lē afio mai i le suafa o le Ali’i.

Misasa - Faitauga muamua – Isaia 50: 4 – 7. Matua: Ou te le’i ufiufi o’u mata i le mā ma le feanu.

Salamo 22: 8 – 9, 17 – 18, 9 – 20, 23 – 24. Tali: Lo’u Atua e, lo’u Atua e, se a ‘ea le mea ua e tu’ulafoa’i mai ai iā te a’u?

Faitauga lona lua – Filipi 2: 6 – 11. Matua: Ua fa’amaulalo o ia e ia lava; o le mea lava lea ua matuā fa’aeaina ai o ia e le Atua.

Fuaiupu a le Evagelia: Ua ‘ana’ana Keriso mo i tatou ua o’o ina maliu, o le maliu lava i le koluse. O le mea lava lea ua matuā fa’aeaina ai o ia e le Atua ma foa’iina atu ai iā te ia o le suafa e silisili i suafa uma lava.

O LE TALA I PUAPUAGA MA LE MALIU O LO TATOU ALI’I O IESU KERISO MAI LE Evagelia Mareko – 14: 1 – 15: 47

Tofitofiga o le Upu:

O le sauniga i le aso Sa i luma mai o le Eseta e ‘ese fo’i lona va’aiga. O faitauga e lua mai le Evagelia ua folafolaina mai ni lagona ‘ese’ese e lua.

Tatou amata i le olioli i le polesesio a le Palema fa’atasi ma Iesu i luga o le asini, ulufale atu i Ierusalem. Ua lauiloaina tele o ia e le au sitiseni ua vala’au iā te ia o lo latou tupu. Ua avatu i ai le fa’aaloga o le “kapeta mumū” ofu talaloa ua tautau i le ala ma lau pama ua fola i le ala. O a tatou fo’i polosesio ma tatalo ma peseina o le hosana e fesoasoani le faia o se va’aiga fiafia.

Na fa’afuase’ia lava ona fe’emo uila o le vaitau tautotogo, na suia ai ma le lagona. O le Evagelia lona lua na fa’aioa mai ai o le tupu ua fa’aleagaina o se tagata solitulafono. O le polosesio manumalō ua suia nei i sasa, tu’ufeanu ma le pefu ua fa’aletonu ai le mānava. Ua leiloa atu lana asini ma i lona tua ua ia tauave ai se koluse mamafa ma le pagātia. Ua tu’ua e le koluse Ierusalem ma e lē o se fiafia – o se *savaliga i le fa’asalaga*.

O le sauniga ua faia se liliuga atoatoa, e pei o le ulua’i motu o tagata na liliu mai le - “ia ola le tupu”

Faitau mo le Masina o Mati – 2024

aga'i atu i le tauvala'au, "fa'akoluse iā te ia." A tatou manana'o i se fa'ata'ita'iga o le lauiloa vave, ua tatou mauaina i'inei. O Iesu o le tupu mo se aso. Na alualu mālīe lava o le fiafia sa amata mai ai, na mou malie atu ma ua tatou mulimuli atu i le savaliga o le maliu aga'i atu i Kalevalio.

O le patipatia ma'ale'ale o le Misasa, faitauga o le vaega a Iesu, fa'alogo i ana tagatā palisi ua tauvala'au mai, "fa'akoluse iā te Ia." E ui ua ia iloaina o le to'atele o latou e lē faia mai iā latou lava lagona, ua ia lagonaina lava le tigā, ua iloaina e Iesu o ana uō ua vala'auina nei mo ia ina ia puapuagtia i se maliu sauā tele.

O le Ali'i, e pei ona i ai ananafi, le asō ma le fa'avavau, ua milosia e le natura fesuisuia'i a le tagata ua le mafai ona tumau i ni aso se lua soso'o. O lenei fe'au mata'ina ma le fevaevaea'i, ua pulea atoa le alaleo ua lagonaina, fa'ailoa mai iā i tatou le vaiaso sili o le tausaga atoa. O maualuga ma maualalo 'ese'ese o le Vaiaso Pa'ia o le a fa'amatalaina ma fa'atulafonoina e le Ekalesia a o savalia le vaiaso. So'o se tasi lava e manatu i le Fa'aola o le a mana'o e mulimuli iā te ia e ala atu i nei aso taūa tele i luma atu

Ina ia fa'aalia ituaiga o puapuagā sa tauaveina e Iesu, e masani i le Ekalesia ona fa'aogaina le upu, *Pasio – puapuagā*. O se fa'aupuga na filifilia ma le mafauauina, o lona uiga puapuagatia tele sa a'afia ai le sauaina tele o le tino, le atuatuvaile ma le mafatia o le mafauau. O le fitu o aso i luma mai o le Eseta ua i ai auala mo tigā fa'aletagata a tatou ta'ito'atasi ia avea ma ni mea itiiti lava.

Aso 31 Mati Aso Sa o le Toetu a lo tatou Ali'i.

Faitauga muamua – Galuega 10: 34. 37 – 43. Matua: O i matou nei lava sa matou 'a'ai ma feinu ma ia, ina ua toe tu mai o ia i e ua oti.

19

Salamo 118: 1 – 2 (tali), 16 – 17 (tali), 22 – 23 (tali). Tali: O le aso nei ua faia e le Ali'i; ia tatou olioli ma fiafia i ai.

Kolose 3: 1 – 4. Matua: Ia outou sa'ili i mea o i lugā, o i ai Keriso.

Solo: Kerisiano e, ia fai vi'iga ma taulaga i le Paseka ua fasia. Ua Togiola mamoe e le tama'i mamoe; o Keriso lē sala ua ia fa'aleleia i le Tamā o e agasala. Ua tau le oti ma le ola, o le tauviga uiga 'ese; ua maliu le ta'ita'i o le ola, a e malō ia, ua soifua.

Maria e, ta'u mai ia, po o a mea na e va'aia i le ala? Na ou va'aia le tu'ugamau o Keriso soifua, ma le mamalu o lē ua toetū. Na ou va'aia fo'i agaelu molimau, o ie na tanuma'i, ma le solosolo. Ua toetū Keriso lo'u fa'amoemoe; e muamua atu iā te outou i Kalilaia.

Ua mautinoa le toe tu o KERISO NAI E UA OTI. O OE LE TUPU MANUMALŌ, ALOFA MAI IA TE I MATOU

Aleluia, Aleluia... O Keriso la tatou Paseka ua fasia mo i tatou; ia tatou faia le tausamiga ma le fiafia i le Ali'i...Aleluia.

Evagelia – Ioane 20: 1 – 9. Matua: E le'i iloa e i latou le tusi, e ao ina toe tu o ia nai ē ua oti.

Tofitofiga o le Upu:

O le toe fo'i mai o Keriso mai le oti o se fa'ate'ia, pe a tatou mafauifau i ai. O ai na toe fuafuaina o ia e toe va'aia? E ui sa ia valo'iaina ae sa tele le leai o se talitonu. Atonu sa manatu tagata o lo'o fa'auigaina i se manatu fa'atusa – e pei o le toetu a'e i manatu ma mafauauga, ae lē o le ola moni.

I le Aso Sa o le Eseta, na fa'ailoa mai ai e Iesu se tino – mamalu ola fou i le lalolagi. Ua le na o se toe fa'afouina e pei ona ia avatu i le afafine a Iario, le tama a le fafine mai le a'ai o Naina po o lana uō o Lasalo. O nei tagata ua toe maua mai o latou ola i tino tuai fa'alalo nei, ma o le a toe oti. Sa fa'aalia e Iesu se ituaiga o tino toetū fou o le a lē toe oti.

O lo'o i ai se misitelio fa'anatura ma le tumau ua va'aia fa'atasi ma le maliu, tu'ugamau ma le ola i le lumana'i. O Initia Amerika e tatanu mea'ai mo le faigamalaga. I le tausaga 1922 sa mauaina ai se 'oa



Faitau mo le Masina o Mati – 2024

i se tu'ugamau o le 14 seneturi B.C. le tupu a Aikupito, o Tutanhamon, sa maofa ai tagata asi. Ae sa iai se mea na mauaina ua sili atu ma tumau sa mauaina i le tu'ugamau a Iesu. O se mea e leai sona tau o le tu'ugamau ua gaogao. O 'oa uma na maua, e leai ma se isi e mafai ona fa'atusatusa ma le tu'ugamau na maua atu ua leai se isi i totonu.

I le va o le olaga fa'alalolagi nei ma le fa'avavau sa i ai se puipui tele ma se vanu loloto, ua ta'ua o le maliu. Sa toe fa'atavale i tua e Iesu le ma'a tele ma soso'o le vanu. Ua le mafai e le tu'ugamau ona taofiofi o ia. O Iesu ua i ai nei ma le au feola.

Sa folafola mai e le Ali'i e tumau pea ma i tatou – i taimi o tatou olaga fa'alalolagi nei, i le maliu ma le fa'avavau. Sa maliu o ia ma toetū, e lē toe maliu, ma ofoina mai iā i tatou se vala'aulia e matala pea aga'i atu i le lumana'i. Tatou te tamomo'e aga'i atu i le tu'ugamau fa'atasi ma aposetolo e to'alua i le Eseta ma mauaina ai se mealofa fou e leai sona tau o le Keriso Toetū.

O le upu "Eseta" e lē o se fa'aupuga fa'atusi pa'ia ae o lona amataga e mai le fa'a- Enelagi, na alu a'i ua maua lona nofoaga ia tatou sauniga ma telosia i se aso na mulimuli mai. Ua atagia mai ai le fa'amanatuina ai le vaitau o le taututupu a'e ina ua toe ala mai le natura mai le loloto o le taugāmalulū ma toe fa'amatagofie le laolagi. Na toetū Iesu fa'atasi ma le natura. O lenei mea na tupu e lē toe fa'afilemūina, ona ua tautala ma le vavalalata ma o tatou popolega ma fa'amoemoe. O le umi lava o le taimi, o le tala o le Keriso Toetū o le a fa'alogoia pea le tatagi mai le tasi augatupulaga aga'i atu i le isi ma o ana fa'amoemoega – fa'atumulia e le olioli o le a fa'alogoia pea mai le tasi seneturi aga'i atu i le isi.

Faitauga mo le aso Sa muamua o Aperila 2024

Aso 7 Aperila : Faitauga muamua – Galuega 4: 32 – 35. Matua: Ua tasi lava le loto ma le manatu o e fa'atuatua uma lava.

Salamo – 118: 2 – 4 (tali), 16 – 17 (tali), 22 – 24 (tali). Tali: Vivi'i atu ia outou i le Ali'i, auā e lelei o ia, auā e fa'avavau lava lona alofa.

Aleluia, Aleluia...Toma e, ua e fa'atuatua ina ua e va'ai mai iā te a'u. Amuia o e lē va'ai mai, ae fa'atuatua mai pea...Aleluia.

Faitauga lona lua - 1 Ioane 5: 1 – 6. Matua: O i latou uma o e fanau mai i le Atua, e manumalō i latou i le lalolagi.

Evangelia – Ioane 20: 19 0 31. Matua: Ua mavae aso e valu, ua maliu atu Iesu, ua tu fo'i o ia i totonu.

20



Cathedral Restoration campaign updates. Still fundraising \$1 million towards this work. The reopening is due for June this year.

Mikaele Teofilo: 021 0818 5037